

መጽሐፈ ሄኖክ
كتب الهينوك
ሐምሌ 16 2009-

1 ቃለ : በረከት : ዘሄኖክ : ዘከመ : ባረከ : ጎሩያነ
 : ወጻድቃነ : እለ : ሀለዉ : ይኩኑ : በዕለተ :
 ምንዳቤ : ለአሰስሎ : ኩሉ : እኩያን : ወረሲዓን ።
 ወአውሥአ : ወይቤ : ሄኖክ : ብእሲ : ጻድቅ :
 ዘእምነበ : እግዚአብሔር : እንዘ : አዕይንቲሁ :
 ክሡታት : ወይሬኢ : ራእየ : ቅዱስ : ዘበሰማያት :
 ዘአርአዩኒ : መላእክት : ወሰማዕኩ : እምነቤሆሙ :
 ኩሎ : ወአእመርኩ : አነ : ዘእሬኢ : ወአኮ : ለዝ :
 ትውልድ : አላ : ለዘይመጽእ : ትውልድ : ርኑቃን ።
 በእንተ : ጎሩያን : እቤ : ወአውሣእኩ : በእንቲአሆሙ
 : ምስለ : ዘይወፅእ : ቅዱስ : ወዐቢይ : እማነደሩ :
 ወአምላክ : ዓለም ። ወእምህየ : ይከይድ : ዲበ : ሲና
 : ደብር : ወያስተርኢ : በትዕይንቱ : ወያስተርኢ :
 በጽንዐ : ጎይሉ : እምሰማይ ። ወይፈርህ : ኩሉ :
 ወያድለቀልቁ : ትጉሃን : ወይነሥአሙ : ፍርሀት :
 ወረዓድ : ዐቢይ : እስከ : አጽናፈ : ምድር ።
 ወይደነግፁ : አድባር : ነዋኃን : ወይቴሐቱ : አውግር
 : ነዋኃት : ወይትመስዉ : ከመ : መዓረ : ግራ :
 እምላህብ ። ወትሠጠም : ምድር : ወኩሉ : ዘውስተ
 : ምድር : ይትሐጐል : ወይከውን : ፍትሕ : ላዕለ
 : ኩሉ : ወላዕለ : ጻድቃን : ኩሎሙ ። ለጻድቃንስ :
 ሰላመ : ይገብር : ሎሙ : ወየዐቅቦሙ : ለጎሩያን :
 ወይከውን : ሣህል : ላዕሌሆሙ : ወይከውኑ :
 ኩሎሙ : ዘእምላክ : ወይሤርሑ : ወይትባረኩ :
 ወይሀርህ : ሎሙ : ብርሃነ : እምላክ ። ወናሁ :
 መጽአ : በትእልፈት : ቅዱሳን : ከመ : ይግበር :
 ፍትሕ : ላዕሌሆሙ : ወያሐጉሎሙ : ለረሲዓን :
 ወይትዋቀስ : ኩሎ : ዘሥጋ : በእንተ : ኩሉ :
 ዘገብሩ : ወረሰዩ : ላዕሌሁ : ኃጥአን : ወረሲዓን ።
 2 ጠየቁ : ኩሎ : ዘውስተ : ሰማይ : ግብረ : እፎ
 : ኢይመይጡ : ፍናዊሆሙ : ብርሃናት : ዘውስተ :
 ሰማይ : ከመ : ኩሉ : ይሠርቅ : ወየዐርብ : ሥሩዕ
 : ኩሉ : በበዘመኑ : ወኢይትዐደዉ : እምትእዛዞሙ ።
 ርእይዋ : ለምድር : ወለብዉ : በእንተ : ምግባር :
 ዘይትገበር : ላዕሌሃ : እምቀዳሚ : እስከ : ተፍጻሜቱ
 : ከመ : እይትመየጥ : ኩሉ : ግብሩ : ለእምላክ :
 እንዘ : ያስተርኢ ። ርእይዎ : ለሐጋይ : ወለክረምት
 : ከመ : ኩላ : ምድር : መልአት : ማየ : ወደመና
 : ወጠል : ወዝናም : የዐርፍ : ላዕሌሃ ።
 3 ጠየቁ : ወርኢኩ : ከመ : ኩሉ : ዐፀው : እፎ :
 ያስተርእዩ : ከመ : ይቡስ : ወኩሉ : አቋጽሊሆሙ
 : ንጉፋት : ዘእንበለ : ፲ወ፱ዐፀው : ዘኢይትነገፍኡ :
 እለ : ይጸንሑ : እምብሉይ : እስከ : ይመጽእ :
 ሐዲስ : እም፪ወእም፫ክረምት ።
 4 ወዳግመ : ጠየቁ : መዋዕለ : ሐጋይ : ከመ : ኮነ
 : ፀሐይ : ላእሌሃ : በቅድሜሃ : ወአንትሙስ :
 ተጎሥሡ : ምጽላለ : ወጽላሎተ : በእንተ : ዋዕየ :
 ፀሐይ : ወምድርኒ : ትውዒ : እሙቀተ : ሐሩር :
 ወአንትሙስ : ኢትክሉ : ከይዶታ : ለምድር :
 ወኢኩኩሐ : በእንተ : ዋእያ ።

5 ጠየቁ ፡ እፎ ፡ ዕፀው ፡ በሐመልማለ ፡ አቀጽጽል ፡
 ይትክደኑ ፡ ወይፈርዩ ፡ ወለብዉ ፡ በእንተ ፡ ኩሉ ፡
 ወአእምሩ ፡ በከመ ፡ ገብረ ፡ ለክሙ ፡ እሎንተ ፡
 ኩሎሙ ፡ ዘሕያው ፡ ለዓለም ። ወምግባሩ ፡ ቅድሜሁ ፡
 ፡ ለለዓመት ፡ ዘይከውን ፡ ወኩሉ ፡ ምግባሩ ፡
 ይትቀነዩ ፡ ሎቱ ፡ ወኢይትመየጡ ፡ አላ ፡ በከመ ፡
 ሠርዐ ፡ አምላክ ፡ ከመዝ ፡ ይትገበር ፡ ኩሉ ። ወርእዩ ፡
 ፡ እፎ ፡ አብህርት ፡ ወአፍላግ ፡ ኅቡረ ፡ ይፌጽሙ ፡
 ግብሮሙ ። ወአንትሙሰ ፡ ኢተዐገሥክሙ ፡
 ወኢገበርክሙ ፡ ትእዛዘ ፡ እግዚእ ፡ እላ ፡
 ተዐደውክሙ ፡ ወሐመይክሙ ፡ ዓቢያተ ፡ ወድሩካተ ፡
 ቃላተ ፡ በአፍ ፡ ርኩስት ፡ ዘዚአክሙ ፡ ላዐለ ፡ ዕበየ ፡
 ፡ ዚአሁ ፤ ይቡሳነ ፡ ልብ ፡ ኢትከውነክሙ ፡ ሰላም ።
 ወበእንተዝ ፡ አንትሙ ፡ መዋዕሊክሙ ፡ ትረግሙ ፡
 ወዓመታተ ፡ ሕይወትክሙ ፡ ተሐጉሉ ፡ ወይበዝኅ ፡
 መርገም ፡ ዘለዓለም ፡ ወኢይከውነክሙ ፡ ሣህል ።
 በውእቱ ፡ መዋዕል ፡ ትሁቡ ፡ ሰላም ፡ ዚአክሙ ፡
 በርግመት ፡ ዘለዓለም ፡ ለኩሉ ፡ ጻድቃን ፡ ወኪያክሙ ፡
 ፡ ይረግሙ ፡ ኃጥአን ፡ ዘልፈ ፡ ወለክሙ ፡ ኅቡረ ፡
 ምስለ ፡ ኃጥአን ። ወለኅሩያንስ ፡ ይከውን ፡ ብርሃን ፡
 ወፍሥሐ ፡ ወሰላም ፡ ወእሙንቱ ፡ ይወርስዋ ፡
 ለምድር ፡ ወለክሙሰ ፡ ረሲዓን ፡ ይከውነክሙ ፡
 ርግመት ። ወአመሂ ፡ ይትወሀቦሙ ፡ ለኅሩያን ፡ ጥበብ ፡
 ፡ ወኩሎሙ ፡ እሎንቱ ፡ የሐይዉ ፡ ወኢይደግሙ ፡
 አበሳ ፡ ኢበረሲዕ ፡ ወኢበትዕቢት ፡ አላ ፡ ይገንዩ ፡
 ዘበሙ ፡ ጥበብ ፡ ኢይደግሙ ፡ አብሶ ። ወኢይትኳነኑ ፡
 ፡ ኩሎ ፡ መዋእለ ፡ ሕይወቶሙ ፡ ወኢይመውቱ ፡
 በመቅሠፍት ፡ ወኢበመዓት ፡ አላ ፡ ጉልቄ ፡ መዋዕለ ፡
 ፡ ሕይወቶሙ ፡ ይፌጽሙ ፡ ወይልህቅ ፡ ሕይወቶሙ ፡
 ፡ በሰላም ፡ ወዓመታተ ፡ ፍሥሐሆሙ ፡ ይበዝኅ ፡
 በሐሜት ፡ ወበሰላም ፡ ዘለዓለም ፡ ውስተ ፡ ኩሉ ፡
 መዋእለ ፡ ሕይወቶሙ ።

6 ወኮነ ፡ እምዘ ፡ በዝኑ ፡ ውሉደ ፡ ሰብእ ፡
 በእማንቱ ፡ መዋእል ፡ ተወልደ ፡ ሎሙ ፡ አዋልድ ፡
 ሠናያት ፡ ወላህያት ፡ ወርእዩ ፡ ኪያሆን ፡ መላእክት ፡
 ውሉደ ፡ ሰማያት ፡ ወፈተውዎን ፡ ወይቤሉ ፡
 በበይናቲሆሙ ፡ ንዑ ፡ ንኅረይ ፡ ለነ ፡ አንስተ ፡
 እምውሉደ ፡ ሰብእ ፡ ወንለድ ፡ ለነ ፡ ውሉደ ፡
 ወይቤሎሙ ፡ ስምያዛ ፡ ዘውእቱ ፡ መልአኮሙ ፡
 እፈርህ ፡ ዮጊ ፡ ኢትፈቅዱ ፡ ይትገበር ፡ ዝንቱ ፡
 ግብር ፡ ወእከውን ፡ አነ ፡ ባሕቲትየ ፡ ፈዳዪሃ ፡ ለዛቲ
 ፡ ኅጢአት ፡ ዐባይ ፡ ወአውሥኡ ፡ ሎቱ ፡ ኩሎሙ ፡
 ወይቤሉ ፡ መሐላ ፡ ንምሐል ፡ ኩልነ ፡ ወንትዋገዝ ፡
 በበይናቲነ ፡ ከመ ፡ ኢንሚጣ ፡ ለዛቲ ፡ ምክር ፡
 ወንግበራ ፡ ለዛቲ ፡ ምክር ፡ ግብረ ፡ አሜሃ ፡ መሐሉ
 ፡ ኩሎሙ ፡ ኅቡረ ፡ ወአውገዙ ፡ ኩሎሙ ፡
 በበይናቲሆሙ ፡ ቦቱ ፡ ወኮኑ ፡ ኩሎሙ ፡ ፪፻ ፡
 ወወረዱ ፡ ውስተ ፡ አርዲስ ፡ ዝውእቱ ፡ ድማሑ ፡
 ለደብረ ፡ አርሞን ፡ ወጸውዕዎ ፡ ለደብረ ፡ አርሞን ፡
 እስመ ፡ መሐሉ ፡ ቦቱ ፡ ወአውገዙ ፡ በበይናቲሆሙ ፡
 ወዝንቱ ፡ አስማቲሆሙ ፡ ለመላእክቲሆሙ ፡ ስምያዛ ፡
 ዘውእቱ ፡ መልአኮሙ ፡ ኡራኪበራሜኤል ፡ አኪበኤል
 ፡ ጣሚኤል ፡ ራሙኤል ፡ ዳንኤል ፡ ኤዜቄኤል ፡
 ሰራቁያል ፡ አሳኤል ፡ አርምርስ ፡ በጥረአል ፡ አናንኢ
 ፡ ዘቄቤ ፡ ሰምሳዌኤል ፡ ሰርተኤል ፡ ጡርኤል ፡
 ዮምያኤል ፡ አራዝያል ፡ እሉ ፡ እሙንቱ ፡ ሀበይቶሙ
 ፡ ለ፪፻መላእክት ፡ ወባዕዳን ፡ ኩሉ ፡ ምስሌሆሙ ፡
 7 ወነሥኡ ፡ ሎሙ ፡ አንስትያ ፡ ወኅረየ ፡ ኩሉ ፡
 ለለርእሱ ፡ አሐተ ፡ አሐተ ፡ ወወጠኑ ፡ ይባኡ ፡
 ኅቤሆን ፡ ወተደመሩ ፡ ምስሌሆን ፡ ወመሐርዎን ፡
 ሥራያተ ፡ ወስብዓታተ ፡ ወመቲረ ፡ ሥርው ፡ ወዕፀው
 ፡ አመርዎን ፡ ወእማንቱስ ፡ ፀንሳ ፡ ወወለዳ ፡ ረዓይተ
 ፡ ዐበይተ ፡ ወቆሞሙ ፡ በበ ፡ ፴፻ ፡ በእመት ፡ እሉ
 ፡ በልዑ ፡ ኩሎ ፡ ፃማ ፡ ሰብእ ፡ እስከ ፡ ስእንዎሙ
 ፡ ሴስዮተ ፡ ሰብእ ፡ ወተመይጡ ፡ ረዓይት ፡
 ላዕሌሆሙ ፡ ይብልዕዎሙ ፡ ለሰብእ ፡ ወወጠኑ ፡
 የአብሱ ፡ በአዕዋፍ ፡ ወዲበ ፡ አራዊት ፡
 ወበዘይትሐወስ ፡ ወበዓሣት ፡ ወሥጋሆሙ ፡
 በበይናቲሆሙ ፡ ይትባልዑ ፡ ወደመ ፡ ይስትዩ ፡
 እምኔሃ ፡ አሜሃ ፡ ምድር ፡ ሰከየቶሙ ፡ ለዐማፅያን ፡
 8 ወአዛዝኤል ፡ መሐሮሙ ፡ ለሰብእ ፡ ገቢረ ፡
 አስይፍት ፡ ወመጥባሕት ፡ ወወልታ ፡ ወድርዓ ፡
 እንግድዓ ፡ ወአርአዮሙ ፡ ዘእምድኅሬሆሙ ፡
 ወምግባረሆሙ ፡ አውቃፋተ ፡ ወሠርጐ ፡ ወተኩሕሎተ
 ፡ ወአሠንዮ ፡ ቀራንብት ፡ ወእብነ ፡ እምኩሉ ፡ እብን
 ፡ ክቡረ ፡ ወኅሩየ ፡ ወኩሎ ፡ ጥምዓታተ ፡ ኅብር ፡
 ወተውላጠ ፡ ዓለም ፡ ወኮነ ፡ ርስዐት ፡ ዓቢይ ፡
 ወብዙኅ ፡ ዘምዎ ፤ ወስሕቱ ፡ ወማሰና ፡ ኩሉ ፡
 ፍናዊሆሙ ፡ አሜዛራክ ፡ መሀረ ፡ ኩሎ ፡ መሳብዕያነ
 ፡ ወመታርያነ ፡ ሥርዋት ፤ አርማሮስ ፡ ፈትሐ ፡
 ስብዓታተ ፤ ወበረቅዓል ፡ ረዓይያነ ፡ ከዋክብት ፤
 ወኮከብኤል ፡ ትእምርታተ ፤ ወጥምኤል ፡ መሀረ ፡
 ራእየ ፡ ኮከብ ፤ ወአስራድኤል ፡ መሀረ ፡ ሩፀተ ፡
 ወርኅ ፡ ወበኅጉለተ ፡ ሰብእ ፡ ጸርሑ ፡ ወበጽሐ ፡
 ቃሎሙ ፡ ሰማየ ፡

9 ወአሜሃ ፡ ሐወጹ ፡ ሚካኤል ፡ ወገብርኤል ፡
 ወሱርያን ፡ ወኡርያን ፡ እምሰማይ ፡ ወርእዩ ፡ ብዙኃ
 ፡ ደመ ፡ ዘይትከዐው ፡ በዲበ ፡ ምድር ፡ ወኹሎ ፡
 ዓመፃ ፡ ዘይትገበር ፡ በዲበ ፡ ምድር ፡ ወይቤሉ ፡
 በበይናቲሆሙ ፡ ቃለ ፡ ጽራኃቲሆሙ ፡ ዕራቃ ፡
 ጸርጎት ፡ ምድር ፡ እስከ ፡ አንቀጸ ፡ ሰማይ ፡
 ወይእዜኒ ፡ ለክሙ ፡ አቅዱሳነ ፡ ሰማይ ፡ ይሰክዩ ፡
 ነፍሳተ ፡ ሰብእ ፡ እንዘ ፡ ይብሉ ፡ አብኡ ፡ ለነ ፡
 ፍትሐ ፡ ጎበ ፡ ልዑል ፡ ወይቤሉ ፡ ለእግዚአሙ ፡
 ለንጉሥ ፡ እስመ ፡ እግዚአሙ ፡ ለአጋእዝት ፡
 ወአምላኮሙ ፡ ለአማልክት ፡ ወንጉሦሙ ፡ ለነገሥት ፡
 ወመንበረ ፡ ስብሐቲከ ፡ ውስተ ፡ ኹሎ ፡ ትውልደ ፡
 ዓለም ፡ ወስምከ ፡ ቅዱስ ፡ ወስቡሕ ፡ ውስተ ፡ ኹሎ ፡
 ትውልደ ፡ ዓለም ፡ ወቡሩክ ፡ ወስቡሕ ፡ አንተ ፡
 ገበርከ ፡ ኹሎ ፡ ወሥልጣነ ፡ ኹሎ ፡ ምስሌከ ፡
 ወኹሎ ፡ ክሡት ፡ ቅድሜከ ፡ ወግሁድ ፤ ወአንተ ፡
 ትሬኢ ፡ ኹሎ ፡ ወአልቦ ፡ ዘይትከሀል ፡ ይትጎባእ ፡
 እምኔከ ፡ ርኢኬ ፡ ዘገብረ ፡ አዛዝኤል ፡ ዘከመ ፡
 መሀረ ፡ ኹሎ ፡ ዓመፃ ፡ በዲበ ፡ ምድር ፡ ወአግሀደ
 ፡ ጎቡአተ ፡ ዓለም ፡ እለ ፡ ይትገበራ ፡ በሰማያት ፡
 ወአመረ ፡ ስብዐታተ ፡ ስምያዛ ፡ ዘአንተ ፡ ወሀብኮ ፡
 ሥልጣነ ፡ ይኩንን ፡ እለ ፡ ምስሌሁ ፡ ጎቡረ ፡ ወሐሩ
 ፡ ጎበ ፡ አዋልደ ፡ ሰብእ ፡ ጎቡረ ፡ ወሰከቡ ፡
 ምስሌሆን ፡ ምስለ ፡ እልኩ ፡ አንስት ፡ ወረኹሉ ፡
 ወአግሀዱ ፡ ሎን ፡ እሎንተ ፡ ኃጣውአ ፡ ወአንስትሰ ፡
 ወለዳ ፡ ረዓይተ ፡ ወበዝ ፡ መልአት ፡ ኹላ ፡ ምድር
 ፡ ደመ ፡ ወዐመፃ ፡ ወይእዜኒ ፡ ናሁ ፡ ይጸርሑ ፡
 ነፍሳት ፡ እለ ፡ ሞቱ ፡ ወይሰክዩ ፡ እስከ ፡ አንቀጸ ፡
 ሰማይ ፡ ወዐርገ ፡ ገዓሮሙ ፡ ወኢይክሉ ፡ ወዒአ ፡
 እምቅድመ ፡ ገጸ ፡ ዐመፃ ፡ ዘይትገበር ፡ በዲበ ፡
 ምድር ፡ ወአንተ ፡ ተአምር ፡ ኹሎ ፡ ዘእንበለ ፡
 ይኩን ፤ ወአንተ ፡ ተአምር ፡ ዘንተ ፡ ወዘኢአሆሙ ፡
 ወአልቦ ፡ ዘትነግረነ ፡ ወምንት ፡ መፍትው ፡
 ንረስዮሙ ፡ በእንተ ፡ ዝንቱ ፡

10 ወአሜሃ ፡ ልዑል ፡ ዐቢይ ፡ ወቅዱስ ፡ ተናገረ
 ፡ ወፈነዎ ፡ ለአርስየላልዩር ፡ ጎበ ፡ ወልደ ፡ ላሜክ ፡
 ወይቤሎ ። በሎ ፡ በስመ ፡ ዚአየ ፡ ጎባእ ፡ ርእሰከ ፡
 ወአግህድ ፡ ሎቱ ፡ ፍጻሜ ፡ ዘይመጽእ ፡ እስመ ፡
 ትትሐጐል ፡ ምድር ፡ ኩላ ፡ ወማየ ፡ አይኅ ፡
 ይመጽእ ፡ ሀሎ ፡ ዲበ ፡ ኩላ ፡ ምድር ፡ ወይትጎጐል
 ፡ ዘሀሎ ፡ ውስቴታ ። ወይእዜኒ ፡ መሀሮ ፡ ከመ ፡
 ይንፍጽ ፡ ወይንበር ፡ ዘርኡ ፡ ለኩሉ ፡ ምድር ።
 ወይቤሎ ፡ ካዕበ ፡ እግዚእ ፡ ለሩፋኤል ፡ እስሮ ፡
 ለአዛዝኤል ፡ በእዴሁ ፡ ወእገሪሁ ፡ ወደዮ ፡ ውስተ ፡
 ጽልመት ፡ ወአብቅዋ ፡ ለገዳም ፡ እንተ ፡ ሀለወት ፡
 በዱዳኤል ፡ ወደዮ ፡ ህየ ። ወደይ ፡ ላዕሌሁ ፡ አዕባነ
 ፡ ጠዋያተ ፡ ወበሊኃተ ፡ ወክድኖ ፡ ጽልመተ ፡ ወህየ
 ፡ ይኅድር ፡ ለዓለም ፡ ወክድኖ ፡ ለገጹ ፡ ከመ ፡
 እይርአይ ፡ ብርሃነ ። ወበዕለት ፡ ዐባይ ፡ እንተ ፡ ኩነኔ
 ፡ ከመ ፡ ይትፈነው ፡ ውስተ ፡ ዋዕይ ። ወአሕይዋ ፡
 ለምድር ፡ እንተ ፡ አማሰኑ ፡ መላእክት ፡ ወሕይወታ
 ፡ ለምድር ፡ አይድዕ ፡ ከመ ፡ አሕይዋ ፡ ለምድር ፡
 ወኢይትኃጐሉ ፡ ኩሎሙ ፡ ውሉደ ፡ ሰብእ ፡
 በምሥጢረ ፡ ኩሉ ፡ ዘቀተሉ ፡ ትጉሃን ፡ ወመሀሩ ፡
 ለውሉዶሙ ። ወማሰነት ፡ ኩላ ፡ ምድር ፡ በትምህርተ
 ፡ ግብሩ ፡ ለአዛዝኤል ፡ ወላዕሌሁ ፡ ጸሐፍ ፡ ኩሎ ፡
 ጎጢአተ ። ወለገብርኤል ፡ ይቤሎ ፡ እግዚአብሔር ፡
 ሑር ፡ ዲቤሆሙ ፡ ለመንዝራን ፡ ወለምኑናን ፡ ወዲበ
 ፡ ውሉደ ፡ ዘማ ፡ ወአጎጉሎሙ ፡ ለውሉደ ፡ ዘማ ፡
 ወለውሉደ ፡ ትጉሃን ፡ እምሰብእ ፡ ወአውዕኦሙ ፡
 ወፈነዎሙ ፡ በበይናቲሆሙ ፡ እሙንቱ ፡ ወለሊሆሙ ፡
 በቀትል ፡ ይትጎጐሉ ፡ እስመ ፡ ኑኃ ፡ መዋዕል ፡
 አልበሙ ። ወኩሎሙ ፡ ይስእሉከ ፡ ወኢይከውን ፡
 ለአበዊሆሙ ፡ በእንቲአሆሙ ፡ እስመ ፡ ይሴፈዉ ፡
 ሕይወተ ፡ ዘለዓለም ፡ ወከመ ፡ ይሕየዉ ፡ እምኔሆሙ
 ፡ ፩፻ክራማተ ። ወለሚካኤል ፡ ይቤሎ ፡ እግዚአብሔር
 ፡ አይድዕ ፡ ለስምያዛ ፡ ወለካልኦን ፡ እለ ፡ ምስሌሁ
 ፡ እለ ፡ ጎብሩ ፡ ምስለ ፡ አንስት ፡ ከመ ፡ ይማስኑ ፡
 ምስሌሆን ፡ በኩሉ ፡ ርኩሰ ፡ ዚአሆን ። ሶበ ፡
 ይትራገዙ ፡ ኩሉ ፡ ውሉዶሙ ፡ ወሶበ ፡ ይሬእዩ ፡
 ሐጉሎሙ ፡ ለፍቁራኒሆሙ ፡ እስሮሙ ፡ ለፎትውልድ
 ፡ በመትሕተ ፡ አውግረ ፡ ምድር ፡ እስከ ፡ ዕለተ ፡
 ኩነኔሆሙ ፡ ወተፍጻሜቶሙ ፡ እስከ ፡ ይትፈጸም ፡
 ኩነኔ ፡ ዘለዓለም ፡ ዓለም ። ወበውእቱ ፡ መዋዕል ፡
 ይወስድዎሙ ፡ ውስተ ፡ መትሕተ ፡ እሳት ፡ በፃዕር ፡
 ወበቤተ ፡ ሞቅሕ ፡ ይትዓፀዉ ፡ ለዓለመ ፡ ዓለም ።
 ወሶቤሃ ፡ ይውዒ ፡ ወይማስን ፡ እምይእዜ ፡
 ምስሌሆሙ ፡ ጎቡረ ፡ ይትአሰሩ ፡ እስከ ፡ ተፍጻሜተ
 ፡ ትውልደ ፡ ትውልድ ። ወአጎጉሎሙ ፡ ለኩሎሙ ፡
 ነፍሳተ ፡ ተውኔት ፡ ወለውሉዶሙ ፡ ለትጉሃን ፡ እስመ
 ፡ ገፍዕዎሙ ፡ ለሰብእ ። አጎጉል ፡ ኩሎ ፡ ግፍዕ ፡
 እምገጸ ፡ ምድር ፡ ወኩሉ ፡ ምግባር ፡ እኩይ ፡
 ይኅልቅ ፡ ወያስተርኢ ፡ ተክለ ፡ ጽድቅ ፡ ወርትዕ ፡
 ወይከውን ፡ ለበረከት ፡ ግብር ፤ ጽድቅ ፡ ወርትዕ ፡
 ለዓለም ፡ በፍሥሓ ፡ ይተክሉ ። ወይእዜኒ ፡ ኩሎሙ
 ፡ ጸድቃን ፡ ይገንዩ ፡ ወይከውኑ ፡ ሕያዋነ ፡ እስከ ፡
 ይወልዱ ፡ ፲፻ ፡ ወኩሎ ፡ መዋዕለ ፡ ውርዙቶሙ ፡
 ወሰንበተ ፡ ዚአሆሙ ፡ ይፌጽሙ ፡ በሰላም ።
 ወበእማንቱ ፡ መዋዕል ፡ ትትገበር ፡ ኩላ ፡ ምድር ፡
 በጽድቅ ፡ ወኩሉንታሃ ፡ ትቱክል ፡ ዕፀወ ፡ ወቅመልዕ
 ፡ በረከተ ። ወኩሎ ፡ ዕፀወ ፡ ኃሄት ፡ ይተክሉ ፡
 ዲቤሃ ፡ ወይተክሉ ፡ ዲቤሃ ፡ እውያነ ፡ ወወይን ፡

11 ወበእማንቱ ፡ መዋዕል ፡ እፈትሕ ፡ መዛግብተ ፡
በረከት ፡ እለ ፡ በሰማይ ፡ ከመ ፡ አውርዶሙ ፡ ዲበ
፡ ምድር ፡ ዲበ ፡ ግብሮሙ ፡ ወዲበ ፡ ማሆሙ ፡
ለውሉደ ፡ ሰብእ ። ሰላም ፡ ወርትዐ ፡ ሱቱፋነ ፡
ይከውኑ ፡ በኩሉ ፡ መዋዕለ ፡ ዓለም ፡ ወበኩሉ ፡
ትውልደ ፡ ዓለም ።

12 ወእምቅድመ ፡ ኩሉ ፡ ነገር ፡ ተከብተ ፡ ሄኖክ
፡ ወአልቦ ፡ ዘየአምሮ ፡ እምውሉደ ፡ ሰብእ ፡ በኅበ ፡
ተከብተ ፡ ወኅበ ፡ ሀሎ ፡ ወምንተ ፡ ኮነ ። ወኩሉ ፡
ግብሩ ፡ ምስለ ፡ ቅዱሳን ፡ ወምስለ ፡ ትጉሃን ፡
በመዋዕለ ፡ ዚአሁ ። ወአነ ፡ ሄኖክ ፡ ኮንኩ ፡ እባርኮ
፡ ለእግዚእ ፡ ዐቢይ ፡ ወለንጉሠ ፡ ዓለም ፡ ወናሁ ፡
ትጉሃን ፡ ይጼውዑኒ ፡ ሊተ ፡ ለሄኖክ ፡ ጸሓፊ ፡
ወይቤሉኒ ። ሄኖክ ፡ ጸሓፊ ፡ ጽድቅ ፡ ሑር ፡ አይድዕ
፡ ለትጉሃነ ፡ ሰማይ ፡ እለ ፡ ኀደጉ ፡ ሰማየ ፡ ልዑለ
፡ ወምቅዋመ ፡ ቅዱስ ፡ ዘለዓለም ፡ ወምስለ ፡ አንስት
፡ ማሰኑ ፡ ወገብሩ ፡ ዘከመ ፡ ይገብሩ ፡ ውሉደ ፡
ሰብእ ፡ ወነሥኡ ፡ ሎሙ ፡ አንስተ ፡ ወማሰኑ ፡ ዐቢየ
፡ ሙስና ፡ በዲበ ፡ ምድር ። ወኢይከውን ፡ ሎሙ ፡
በዲበ ፡ ምድር ፡ ሰላም ፡ ወኅድገተ ፡ ኀጢአት ፡
እስመ ፡ ኢይትፌሥሑ ፡ በውሉደሙ ። ቀትለ ፡
ፍቁራኒሆሙ ፡ ይሬእዩ ፡ ወዲበ ፡ ሐጉለ ፡ ውሉደሙ
፡ ይግዕሩ ፡ ወይስእሉ ፡ ለዓለም ፡ ወኢይከውን ፡
ሎሙ ፡ ምሕረት ፡ ወኢሰላም ።

13 ወሄኖክ ፡ ኀሊፎ ፡ ይቤሎ ፡ ለአዛዝኤል ፡
ኢይከውነከ ፡ ሰላም ፡ ዐቢይ ፡ ኩነኔ ፡ ወፅአ ፡ ላዕሌከ
፡ ይእሥርከ ። ወሣኅት ፡ ወስእለት ፡ ወምሕረት ፡
ኢይከውነከ ፡ በእንተ ፡ ዘመሀርከ ፡ ግፍዐ ፡ ወበእንተ
፡ ኩሉ ፡ ምግባረ ፡ ጽርፈት ፤ ወግፍዕ ፤ ወኀጢአት ፤
ዘአርአይከ ፡ ለውሉደ ፡ ሰብእ ። አሜሃ ፡ ሐዊርየ ፡
ነገርከዎሙ ፡ ለኩሎሙ ፡ ኀቡረ ፤ ወእሙንቱ ፡ ፈርሀ
፡ ኩሎሙ ፡ ፍርሃት ፡ ወረዓድ ፡ ነሥአሙ ።
ወተስእሉኒ ፡ ተዝካረ ፡ ስእለት ፡ ከመ ፡ እጽሐፍ ፡
ሎሙ ፡ ከመ ፡ ይኩኖሙ ፡ ኀድገተ ፡ ወከመ ፡ አነ ፡
አዕርግ ፡ ተዝካረ ፡ ስእለቶሙ ፡ ኀበ ፡ እግዚአብሔር
፡ ሰማየ ። እስመ ፡ ኢይክሉ ፡ እሙንቱ ፡ እምይእዜ ፡
ተናግሮ ፡ ወኢያነሥኡ ፡ አዕይንቲሆሙ ፡ ውስተ ፡
ሰማይ ፡ እምኃፍረተ ፡ አበሳሆሙ ፡ ዘተኩነኑ ። ወአሜሃ
፡ ጸሐፍኩ ፡ ተዝካረ ፡ ስእለቶሙ ፡ ወአስተብቀሥቶሙ
፡ በእንተ ፡ መንፈሶሙ ፡ ወለለ ፡ ፩ምግባሮሙ ፡
ወበእንተ ፡ ዘይስእሉ ፡ ከመ ፡ ይኩኖሙ ፡ ስርየተ ፡
ወኑኅተ ። ወሐዊርየ ፡ ነበርኩ ፡ ዲበ ፡ ማያተ ፡ ዳን ፡
በዳን ፡ እንተ ፡ ይእቲ ፡ እምየማነ ፡ ዓረበ ፡ አርሞን
፡ ወእነብብ ፡ ተዝካረ ፡ ስእለቶሙ ፡ እስከ ፡ ደቀስኩ
። ወናሁ ፡ ሕልም ፡ መጽአኒ ፡ ወራእያት ፡ ዲቤየ ፡
ወድቁ ፡ ወርኢኩ ፡ ራእየ ፡ መቅሠፍት ፡ እንግር ፡
ለውሉደ ፡ ሰማይ ፡ ወእዛለፎሙ ። ወነቂሕየ ፡ መጻእኩ
፡ ኀቤሆሙ ፡ ወኩሎሙ ፡ ጉቡዓነ ፡ ይነብሩ ፡ እንዘ
፡ ይላሕዉ ፡ በኡብልስያኤል ፡ ዘሀለወት ፡ ማእከለ ፡
ሊባኖስ ፡ ወሴኔሴር ፡ እንዘ ፡ ግልቡባን ፡ ገጾሙ ።
ወተናገርኩ ፡ በቅድሚሆሙ ፡ ኩሎ ፡ ራእያተ ፡
ዘርኢኩ ፡ በንዋምየ ፡ ወወጠንኩ ፡ እትናገር ፡ ውእተ
፡ ቃላተ ፡ ጽድቅ ፡ ወእዝልፍ ፡ ለትጉሃነ ፡ ሰማይ ።

14 ዝመጽሐፍ ፡ ቃለ ፡ ጽድቅ ፡ ወዘለፋ ፡ ትጉሃን
 ፡ እለ ፡ እምዓለም ፡ በከመ ፡ አዘዘ ፡ ቅዱስ ፡
 ወዐቢይ ፡ በይእቲ ፡ ራእይ ፡ ኣነ ፡ ርኢኩ ፡ በንዋምየ
 ፡ ዘኣነ ፡ ይእዜ ፡ እነግር ፡ በልሳን ፡ ዘሥጋ ፡
 ወበመንፈስየ ፡ ዘወሀበ ፡ ዐቢይ ፡ አፈ ፡ ለሰብእ ፡
 ይትናገሩ ፡ ቦቱ ፡ ወይለብዉ ፡ በልብ ፡ ከመ ፡ ፈጠረ
 ፡ ወወሀበ ፡ ለሰብእ ፡ ይለብዉ ፡ ቃለ ፡ አእምሮ ፡
 ወሊተኒ ፡ ፈጠረ ፡ ወወሀበኒ ፡ እዛለፎሙ ፡ ለትጉሃን
 ፡ ውሉደ ፡ ሰማይ ፡ ኣነ ፡ ስእለተክሙ ፡ ጸሐፍኩ ፡
 ወበራእይየ ፡ ከመዝ ፡ ያስተርኢ ፡ እስመ ፡
 ስእለትክሙ ፡ ኢትከውነክሙ ፡ ውስተ ፡ ኩሉ ፡
 መዋዕለ ፡ ዓለም ፡ ወኩነኔ ፡ ፍጽምት ፡ ላዕሌክሙ ፡
 ወኢይከውነክሙ ፡ ወእምይእዜ ፡ ኢተዓርጉ ፡ ውስተ ፡
 ሰማይ ፡ እስከ ፡ ኩሉ ፡ ዓለም ፡ ወውስተ ፡ ምድር ፡
 ተነግረ ፡ ይእሥርክሙ ፡ በኩሉ ፡ መዋዕለ ፡ ዓለም ፡
 ወእምቅድመ ፡ ዝንቱ ፡ ርኢክሙ ፡ ጎሉለ ፡
 ውሉድክሙ ፡ ፍቁራን ፤ ወአልብክሙ ፡ ጥራያኒሆሙ
 ፡ አላ ፡ ይወድቁ ፡ ቅድሜክሙ ፡ በሰይፍ ፡
 ወስእለትክሙ ፡ በእንቲአሆሙ ፡ ኢይከውን ፡
 ወበእንቲአክሙኒ ፡ ወአንትሙሂ ፡ እንዘ ፡ ትበክዩ ፡
 ወታስተበቑዑ ፡ ወኢትትናገሩ ፡ ወኢምንተኒ ፡ ቃለ ፡
 እምውስተ ፡ መጽሐፍ ፡ ዘጸሐፍኩ ፡ ወሊተ ፡ ከመዝ
 ፡ ራእይ ፡ አስተርአየኒ ፤ ናሁ ፡ ደመናት ፡ በራእይ ፡
 ይጼውዑኒ ፤ ወጊሜ ፡ ይጼውዑኒ ፤ ወሩፀተ ፡ ከዋክብት
 ፡ ወመባርቅት ፡ ያጐጉዑኒ ፡ ወያጽዕቁኒ ፡ ወነፋሳት ፡
 በራእይ ፡ ያሰርሩኒ ፡ ወያጌጉዑኒ ፡ ወነሥኡኒ ፡ ላዐለ
 ፡ ውስተ ፡ ሰማይ ፡ ወቦእኩ ፡ እስከ ፡ እቀርብ ፡ ጎበ
 ፡ ጥቅም ፡ ዘጎንጽት ፡ በእብነ ፡ በረድ ፡ ወልሳነ ፡
 እሳት ፡ የዓውዳ ፡ ወወጠነ ፡ ያፍርሀኒ ፡ ወቦእኩ ፡
 ውስተ ፡ ልሳነ ፡ እሳት ፡ ወቀረብኩ ፡ ጎበ ፡ ቤት ፡
 ዓቢይ ፡ ዘሕኑጽ ፡ በአዕባነ ፡ በረድ ፤ ወአረፍተ ፡
 ውእቱ ፡ ቤት ፡ ከመ ፡ ጸፍጸፈ ፡ ሰሌዳ ፡ በአዕባን ፡
 ዘእምበረድ ፡ ወምድሩ ፡ በረድ ፡ ጠፈሩ ፡ ከመ ፡
 ሩፀተ ፡ ከዋክብት ፡ ወመባርቅት ፤ ወማእከሎሙ ፡
 ኪሩቤል ፡ ዘእሳት ፡ ወሰማየሙ ፡ ማይ ፡ ወእሳት ፡
 ዘይነድድ ፡ በዓውደ ፡ አረፍቱ ፡ ወኖሳቱ ፡ ይውዒ ፡
 በእሳት ፡ ወቦእኩ ፡ ውስተ ፡ ውእቱ ፡ ቤት ፡
 ወምውቅ ፡ ከመ ፡ እሳት ፡ ወቁሪር ፡ ከመ ፡ በረድ ፡
 ወኢምንተኒ ፡ ፍግዓ ፡ ወሕይወት ፡ አልቦ ፡ ውስቴቱ
 ፤ ፍርሃት ፡ ከደነኒ ፡ ወረዓድ ፡ አጎዘኒ ፡ ወእንዘ ፡
 እትሀወክ ፡ ወእርዕድ ፡ ወደቁ ፡ በገጽየ ፡ ወእሬኢ ፡
 በራእይ ፡ ወናሁ ፡ ካልእ ፡ ቤት ፡ ዘየዐቢ ፡ እምዝኩ
 ፡ ወኩሉ ፡ ኖሳቱ ፡ ርኑት ፡ በቅድሜየ ፡ ወጎኑጽ ፡
 በልሳነ ፡ እሳት ፡ ወበኩሉ ፡ ይራደፍድ ፡ በስብሐት ፡
 ወበክብር ፡ ወዕበይ ፡ እስከ ፡ ኢይክል ፡ ዜንዎተክሙ
 ፡ በእንተ ፡ ስብሐቲሁ ፡ ወበእንተ ፡ ዐበዩ ፡ ወምድሩስ
 ፡ እሳት ፡ ወመልዕልቲሁ ፡ መብረቅ ፡ ወምርዋፀ ፡
 ከዋክብት ፡ ወጠፈሩኒ ፡ እሳት ፡ ዘይነድድ ፡ ወነጸርኩ
 ፡ ወርኢኩ ፡ ውስቴቱ ፡ መንበረ ፡ ልዑለ ፤ ወራእዩ ፡
 ከመ ፡ አስሐትያ ፡ ወክበቡ ፡ ከመ ፡ ፀሐይ ፡ ዘያበርህ
 ፡ ወቃለ ፡ ኪሩቤል ፡ ወእመትሕተ ፡ መንበሩ ፡ ዐቢይ
 ፡ ይወፅእ ፡ አፍላገ ፡ እሳት ፡ ዘይነድድ ፤ ወኢይክሉ
 ፡ ርእዮቶ ፡ ወዐቢየ ፡ ስብሐት ፡ ይነብር ፡ ላዕሌሁ ፡
 ወዐጽፋስ ፡ ዘይበርህ ፡ እምፀሐይ ፡ ወይፀዕዱ ፡
 እምኩሉ ፡ በረድ ፡ ወኢይክል ፡ ወኢመኑሂ ፡
 እመላእክት ፡ በዊኦ ፤ ወራእየ ፡ ገጹ ፡ ለክቡር ፡
 ወስቡሕ ፡ ኢይክል ፡ ወኢመኑሂ ፡ ዘሥጋ ፡ ይርአይ ፡
 ኪያሁ ፡ እሳተ ፡ እሳት ፡ ዘይነድድ ፡ በዓውዱ ፡

15 ወአውሥአኒ ፡ ወይቤለኒ ፡ በቃሉ ፡ ሰማዕ ፡
 ኢትፍራህ ፡ ሄኖክ ፡ ብእሲ ፡ ጻድቅ ፡ ወጸሓፌ ፡
 ጽድቅ ፡ ቅረብ ፡ ዝየ ፡ ወሰማዕ ፡ ቃልየ ። ወሑር ፡
 በሎሙ ፡ ለትጉሃነ ፡ ሰማይ ፡ እለ ፡ ፈነዉከ ፡ ትስአል
 ፡ በእንቲአሆሙ ፡ አንትሙ ፡ መፍትሔ ፡ ትስአሉ ፡
 በእንተ ፡ ሰብእ ፡ ወአኮ ፡ ሰብእ ፡ በእንቲአክሙ ።
 በእንተ ፡ ምንት ፡ ኅደግሙ ፡ ሰማየ ፡ ልዑለ ፡
 ወቅዱሰ ፡ ዘለዓለም ፡ ወምስለ ፡ አንስት ፡ ሰከብክሙ
 ፡ ወምስለ ፡ አዋልደ ፡ ሰብእ ፡ ረኩስክሙ ፡
 ወነሣእክሙ ፡ ለክሙ ፡ አንስተ ፡ ወከመ ፡ ውሉደ ፡
 ምድር ፡ ገበርክሙ ፡ ወወለድክሙ ፡ ውሉደ ፡ ረዓይተ
 ። ወአንትሙሰ ፡ መንፈሳውያን ፡ ቅዱሳን ፡ ሕያዋነ ፡
 ሕይወት ፡ ዘለዓለም ፡ በዲበ ፡ አንስት ፡ ረኩስክሙ ፡
 ወበደመ ፡ ሥጋ ፡ አውለድክሙ ፡ ወበደመ ፡ ሰብእ ፡
 ፈተውክሙ ፡ ወገበርክሙ ፡ ከመ ፡ እሙንቱ ፡ ይገብሩ
 ፡ ሥጋ ፡ ወደመ ፡ እለ ፡ እሙንቱ ፡ ይመውቱ ፡
 ወይትኃጉሉ ። ወበእንተዝ ፡ ወሀብክዎሙ ፡ አንስትያ ፡
 ከመ ፡ ይዝርኡ ፡ ላዕሌሆን ፡ ወይትወለዱ ፡ ውሉዱ ፡
 በላዕሌሆን ፡ ከመ ፡ ከማሁ ፡ ይትገበር ፡ ግብር ፡
 በዲበ ፡ ምድር ። ወአንትሙሰ ፡ ቀዳሚ ፡ ኮንክሙ ፡
 መንፈሳውያን ፡ ሕያዋነ ፡ ሕይወት ፡ ዘለዓለም ፡
 ዘኢይመውት ፡ ለኹሉ ፡ ትውልደ ፡ ዓለም ። ወበእንተ
 ፡ ዝንቱ ፡ ኢረሰይኩ ፡ ለክሙ ፡ አንስቲያ ፡ እስመ ፡
 መንፈሳውያንሰ ፡ ውስተ ፡ ሰማይ ፡ ማኅደሪሆሙ ።
 ወይእዜኒ ፡ ረዓይት ፡ እለ ፡ ተወልዱ ፡ እምነፍስት ፡
 ወሥጋ ፡ መናፍስተ ፡ እኩያነ ፡ ይሰመዩ ፡ በዲበ ፡
 ምድር ፡ ወውስተ ፡ ምድር ፡ ይከውን ፡ ማኅደሪሆሙ
 ። ወነፍሳት ፡ እኩያን ፡ ወፅኡ ፡ እምሥጋሆሙ ፡
 እስመ ፡ እመልዕልት ፡ ተፈጥሩ ፡ እምቅዱሳን ፡
 ትጉሃን ፡ ኮኑ ፡ ቀዳሚቶሙ ፡ ወቀዳሚ ፡ መሰረት ፡
 መንፈስ ፡ እኩየ ፡ ይከውኑ ፡ በዲበ ፡ ምድር ፡
 ወመንፈስ ፡ እኩያን ፡ ይሰመዩ ። ወመናፍስተ ፡ ሰማይ
 ፡ ውስተ ፡ ሰማይ ፡ ይከውን ፡ ማኅደሪሆሙ ፤
 ወመናፍስተ ፡ ምድር ፡ እለ ፡ ተወልዱ ፡ በዲበ ፡
 ምድር ፡ ውስተ ፡ ምድር ፡ ማኅደሪሆሙ ። ወመንፈስ
 ፡ ረዓይት ፡ ደመናተ ፡ እለ ፡ ይገፍዑ ፤ ይማስኑ ፤
 ወይወድቁ ፤ ወይትበዕሱ ፤ ወያደቅቁ ፡ ዲበ ፡ ምድር
 ፤ ወኅዘነ ፡ ይገብሩ ፤ ወኢምንተኒ ፡ ዘይበልዑ ፡ እክለ
 ፤ ወኢይጸምዑ ፡ ወኢይትዓወቁ ። ወኢይትነሥኡ ፡
 እሎንቱ ፡ ነፍሳት ፡ ዲበ ፡ ውሉደ ፡ ሰብእ ፡ ወዲበ ፡
 አንስት ፡ እስመ ፡ ወፅኡ ፡ አመ ፡ መዋዕለ ፡ ቀትል
 ፡ ወሙስና ።

16 ወሞተ ፡ ረዓይትኒ ፡ እንተ ፡ ኀበ ፡ ወፅኡ ፡
 መንፈሳት ፡ እምነፍስት ፡ ሥጋሆሙ ፡ ለይኩን ፡
 ዘይማስን ፡ ዘእንበለ ፡ ኩነኔ ፤ ከማሁ ፡ ይማስኑ ፡
 እስከ ፡ ዕለተ ፡ ኩነኔ ፡ ዐባይ ፡ እምዓለም ፡ ዐቢይ ፡
 ይትፌጸም ፡ እምትጉሃን ፡ ወረሲዓን ። ወይእዜኒ ፡
 ለትጉሃን ፡ እለ ፡ ፈነዉከ ፡ ትስኦል ፡ በእንቲአሆሙ ፡
 እለ ፡ ቀዲሙ ፡ በሰማይ ፡ ሀለዉ ። ወእእዜኒ ፡
 አንትሙስ ፡ በሰማይ ፡ ሀለውክሙ ፡ ወኅቡኣት ፡ ዓዲ
 ፡ እተከሥቱ ፡ ለክሙ ፡ ወምኑነ ፡ ምሥጢረ ፡
 አእመርክሙ ፡ ወዘንተ ፡ ዜነውክሙ ፡ ለአንስት ፡
 በጽንዐ ፡ ልብክሙ ፡ ወበዝንቱ ፡ ምሥጢር ፡ ያበዝኃ
 ፡ አንስት ፡ ወሰብእ ፡ እኪተ ፡ በዲበ ፡ ምድር ።
 በሎሙ ፡ እንከሰ ፡ አልብክሙ ፡ ሰላም ።

17 ወነሥኡኒ ፡ ውስተ ፡ ፩መካን ፡ ኀበ ፡ ሀለዉ ፡
 ህየ ፡ ከመ ፡ እሳት ፡ ዘይነድድ ፡ ወሶበ ፡ ይፈቅዱ ፡
 ያስተርእዩ ፡ ከመ ፡ ሰብእ ። ወወሰደኒ ፡ ውስተ ፡
 መካን ፡ ዘዐውሎ ፡ ወውስተ ፡ ደብር ፡ ዘከተማ ፡
 ርእሱ ፡ ይበጽሕ ፡ ውስተ ፡ ሰማይ ። ወርኢኩ ፡
 መካናተ ፡ ብሩሃነ ፡ ወነጐድጓድ ፡ ውስተ ፡ አጽናፍ ፤
 ኀበ ፡ ዕመቄ ፡ ቀስተ ፡ እሳት ፤ ወሐፅ ፤
 ወምጉንጳቲሆሙ ፤ ወሰይፈ ፡ እሳት ፤ ወመባርቅት ፡
 ኩሉ ። ወነሥኡኒ ፡ እስከ ፡ ማየ ፡ ሕይወት ፡
 ዘይትነገር ፡ ወእስከ ፡ እሳተ ፡ ዓረብ ፡ ዘውእቱ ፡
 ይእኅዝ ፡ ኩሎ ፡ ዕርበተ ፡ ፀሐይ ። ወመጻእኩ ፡ እስከ
 ፡ ፈለገ ፡ እሳት ፡ ዘይውኅዝ ፡ እሳቱ ፡ ከመ ፡ ማይ ፡
 ወይትከዐው ፡ ውስተ ፡ ባሕር ፡ ዐቢይ ፡ ዘመንገለ ፡
 ዓረብ ። ወርኢኩ ፡ ኩሎ ፡ ዐበይተ ፡ አፍላገ ፡ ወእስከ
 ፡ ዐቢይ ፡ ጽልመት ፡ በጻሕኩ ፡ ወሖርኩ ፡ ኀበ ፡
 ኩሉ ፡ ዘሥጋ ፡ ያንሶሱ ። ወርኢኩ ፡ አድባረ ፡
 ቆባራት ፡ እለ ፡ ክረምት ፡ ወምክዓወ ፡ ማይ ፡ ዘኩሉ
 ፡ ቀላይ ። ወርኢኩ ፡ አፉሆሙ ፡ ለኩሎሙ ፡ አፍላገ
 ፡ ምድር ፡ ወአፉሃ ፡ ለቀላይ ።

18 ወርኢኩ ፡ መዛግብተ ፡ ኩሉ ፡ ነፋሳት ፡
 ወርኢኩ ፡ ከመ ፡ ቦሙ ፡ አስርገወ ፡ ኩሎ ፡ ፍጥረተ
 ፡ ወመሰረታቲሃ ፡ ለምድር ፡ ወርኢኩ ፡ እብነ ፡
 ማእዘንተ ፡ ምድር ፡ ወርኢኩ ፡ ፱ነፋሳተ ፡ እለ ፡
 ይፀውርዋ ፡ ለምድር ፡ ወለጽንዐ ፡ ሰማይ ፡ ወርኢኩ ፡
 ከመ ፡ ነፋሳት ፡ ይረብብዋ ፡ ለልዕልና ፡ ሰማይ ፤
 ወእሙንቱ ፡ ይቀውሙ ፡ ማእከለ ፡ ሰማይ ፡ ወምድር
 ፡ እሙንቱ ፡ ውእቶሙ ፡ አዕማደ ፡ ሰማይ ፡ ወርኢኩ
 ፡ ነፋሳተ ፡ እለ ፡ ይመይጥዋ ፡ ለሰማይ ፡ እለ ፡
 ያዐርቡ ፡ ለክበበ ፡ ፀሐይ ፡ ወኩሎ ፡ ከዋክብተ ፡
 ወርኢኩ ፡ ዘዲበ ፡ ምድር ፡ ነፋሳተ ፡ ዘይፀውሩ ፡
 ደመናተ ፤ ወርኢኩ ፡ ፍናወ ፡ መላእክት ፤ ርኢኩ ፡
 ውስተ ፡ ጽንፈ ፡ ምድር ፡ ጽንዐ ፡ ዘሰማይ ፡
 መልዕልተ ፡ ወኅለፍኩ ፡ መንገለ ፡ አዜብ ፡ ወይነድድ
 ፡ መዓልተ ፡ ወሌሊተ ፡ ኀበ ፡ ጌአድባር ፡ ዘእምእብን
 ፡ ክቡር ፡ ፫መንገለ ፡ ጽባሕ ፡ ወ፫መንገለ ፡ አዜብ ፡
 ወመንገለ ፡ ጽባሕሰ ፡ ዘእምእብነ ፡ ኀብር ፡ ወ፩ሰ ፡
 ዘእምእብነ ፡ ባሕርይ ፡ ወ፩ኒ ፡ ዘእምእብነ ፡ ፈውስ ፡
 ወዘመንገለ ፡ አዜብ ፡ እምነ ፡ እብን ፡ ቀይሕ ፡
 ወማእከላይሰ ፡ ይጐድእ ፡ እስከ ፡ ሰማይ ፡ ከመ ፡
 መንበሩ ፡ ለእግዚአብሔር ፡ ዘእምእብነ ፡ ፔካ ፡
 ወድማሁ ፡ ለመንበር ፡ ዘእምእብነ ፡ ሰንፔር ፡ ወእሳተ
 ፡ ዘይነድድ ፡ ርኢኩ ፡ ወዘሀሎ ፡ ውስተ ፡ ኩሉ ፡
 አድባር ፡ ወርኢኩ ፡ ህየ ፡ መካነ ፡ ማዕዶቱ ፡ ለዐቢይ
 ፡ ምድር ፡ ህየ ፡ ይትጋብኡ ፡ ማያት ፡ ወርኢኩ ፡
 ንቅዑተ ፡ ምድር ፡ ዕሙቀ ፡ በአእማዲሁ ፡ ለእሳተ ፡
 ሰማይ ፡ ወርኢኩ ፡ በውስቴቶሙ ፡ አዕማደ ፡ ሰማይ ፡
 ዘእ ፡ ሳት ፡ ዘይወርዱ ፡ ወአልቦሙ ፡ ኅልቀኡ ፡
 ወኢመንገለ ፡ መልዕልት ፡ ወኢመንገለ ፡ ዕመቅ ፡
 ወዲበ ፡ ውእቱ ፡ ንቅዑት ፡ ርኢኩ ፡ መካነ ፡
 ወኢጽንዐ ፡ ሰማይ ፡ ላዕሌሁ ፡ ወኢመሠረተ ፡ ምድር
 ፡ በታሕቱ ፡ ወኢማይ ፡ አልቦ ፡ ላዕሌሁ ፡ ወኢአዕዋፍ
 ፡ አላ ፡ መካነ ፡ በድው ፡ ውእቱ ፡ ወግሩመ ፡ ርኢኩ
 ፡ በህየ ፡ ጌከዋክብተ ፡ ከመ ፡ ዐበይት ፡ አድባር ፡
 ዘይነድዱ ፡ ወከመ ፡ መንፈስ ፡ ዘይሴአለኒ ፡ ይቤ ፡
 መልአክ ፡ ዝውእቱ ፡ መካነ ፡ ተፍጻሜቱ ፡ ለሰማይ ፡
 ወለምድር ፤ ቤተ ፡ ሞቅሕ ፡ ኮኖሙ ፡ ዝንቱ ፡
 ለከዋክብተ ፡ ሰማይ ፡ ወለኀይለ ፡ ሰማይ ፡ ወከዋክብት
 ፡ እለ ፡ ያንኩረኩሩ ፡ ዲበ ፡ እሳት ፡ ወእሉ ፡
 ውእቶሙ ፡ እለ ፡ ኀለፉ ፡ ትእዛዘ ፡ እግዚአብሔር ፡
 እምቅድመ ፡ ጽባሐሙ ፡ እስመ ፡ ኢመጽኡ ፡
 በጊዜሆሙ ፡ ወተምዕዖሙ ፡ ወአሠሮሙ ፡ እስከ ፡ ጊዜ
 ፡ ተፍጻሜተ ፡ ኀጢአቶሙ ፡ በዓመተ ፡ ምሥጢር ፡
 19 ወይቤለኒ ፡ ኡርኤል ፡ በዝየ ፡ ተደሚሮሙ ፡
 መላ ፡ እክት ፡ ምስለ ፡ አንስት ፡ ይቀውሙ ፡
 መናፍስቲሆሙ ፡ ወብዙኃ ፡ ራእየ ፡ ከዊኖሙ ፡
 አርኩስዖሙ ፡ ለሰብእ ፡ ወያስሕትዖሙ ፡ ለሰብእ ፡
 ከመ ፡ ይሡዑ ፡ ለአጋንንት ፡ ከመ ፡ አማልክት ፡
 እስመ ፡ በዕለት ፡ ዐባይ ፡ ኩነኔ ፡ በዘይትኳነኑ ፡ እስከ
 ፡ ይትፌጸሙ ፡ ወአንስቲያሆሙኒ ፡ አስሒቶን ፡
 መላእክተ ፡ ሰማይ ፡ ከመ ፡ ሰላማውያን ፡ ይከውና ፡
 ወአነ ፡ ሄኖክ ፡ ርኢኩ ፡ አርአያ ፡ ባሕቲትየ ፡
 አጽናፈ ፡ ኩሉ ፡ ወአልቦ ፡ ዘርእየ ፡ እምሰብእ ፡ ከመ
 ፡ አነ ፡ ርኢኩ ፡

20 ወዝንቱ ፡ ውእቱ ፡ አስማ ፡ ቲሆሙ ፡ ለእለ ፡
 ይተግሁ ፡ ቅዱሳን ፡ መላእክት ። ኡርኤል ፡ ፩እምነ ፡
 መላእክት ፡ ቅዱሳን ፡ እስመ ፡ ዘረዓም ፡ ወዘረዓድ ።
 ሩፋኤል ፡ ፩እምነ ፡ መላእክት ፡ ቅዱሳን ፡ ዘመናፍስተ
 ፡ ሰብእ ። ራጉኤል ፡ ፩እምነ ፡ መላእክት ፡ ቅዱሳን ፡
 ዘይትቤቀሎ ፡ ለዓለም ፡ ወለብርሃናት ። ሚካኤል ፡
 ፩እምነ ፡ መላእክት ፡ ቅዱሳን ፡ እስመ ፡ በዲበ ፡
 ሠናይቱ ፡ ለሰብእ ፡ ተአዛዚ ፡ ዲበ ፡ ሕዝብ ።
 ሰረቃኤል ፡ ፩እምነ ፡ መላእክት ፡ ቅዱሳን ፡ ዘዲበ ፡
 መናፍስተ ፡ እጓለ ፡ እመሕያው ፡ ዘመናፍስተ ፡
 ያጎጥኡ ። ገብርኤል ፡ ፩እምነ ፡ መላእክት ፡ ቅዱሳን ፡
 ዘዲበ ፡ አኪስት ፡ ወዘዲበ ፡ ገነት ፡ ወዘኪሩቤል ።
 21 ወአድኩ ፡ እስከ ፡ መካን ፡ ኀበ ፡ አልቦ ፡
 ዘይትገበር ። ወርኢኩ ፡ በህየ ፡ ግብረ ፡ ግሩመ ፡
 ኢሰማየ ፡ ልዑለ ፡ ወኢምድረ ፡ ሱርርተ ፡ አላ ፡
 መካነ ፡ በድው ፡ ዘድልው ፡ ወግፉም ። ወህየ ፡
 ርኢኩ ፡ ጌከዋክብተ ፡ ሰማይ ፡ እሱራን ፡ በላዕሌሁ ፡
 ኀብረ ፡ ከመ ፡ አድባር ፡ ዐበይት ፡ ወከመ ፡ ዘእሳት
 ፡ እንዘ ፡ ይነድዱ ። ውእተ ፡ ጊዜ ፡ እቤ ፡ በእንተ ፡
 አይ ፡ ኀጢአት ፡ ተአሥሩ ፡ ወበእንተ ፡ ምንት ፡ ዝየ
 ፡ ተገድፉ ። ወይቤለኒ ፡ ኡርኤል ፡ ፩እምነ ፡
 መላእክት ፡ ቅዱሳን ፡ ዘምስሌየ ፡ ውእቱ ፡ ይመርሀኒ
 ፡ ወይቤ ፡ ሄኖክ ፡ በእንተ ፡ መኑ ፡ ትሴአል ፡
 ወበእንተ ፡ መኑ ፡ ትጤይቅ ፡ ወትስእል ፡ ወትጽህቅ
 ። እሉ ፡ ውእቶሙ ፡ እምነ ፡ ከዋክብት ፡ እለ ፡
 ኀለፉ ፡ ትእዛዘ ፡ እግዚአብሔር ፡ ልዑል ፡ ወተአሥሩ
 ፡ በዝየ ፡ እስከ ፡ ይትፌጸም ፡ ትእልፊተ ፡ ዓለም ፡
 ኑልቄ ፡ መዋዕለ ፡ ኃጢአቶሙ ። ወእምህየ ፡ ሖርኩ
 ፡ ካልአ ፡ መካነ ፡ እምዝ ፡ ዘይጌርም ፡ ወርኢኩ ፡
 ግብረ ፡ ግሩመ ፡ እሳት ፡ ዐቢይ ፡ በህየ ፡ ዘይነድድ ፡
 ወያንበለብል ፡ ወመምተርት ፡ ቦቱ ፡ ወሰኑ ፡ እስከ ፡
 ቀላይ ፡ ፍጹም ፡ አዕማደ ፡ እሳት ፡ ዐበይት ፡
 ዘያወርድዎሙ ፡ ወኢአምጣኖ ፡ ወኢዕበዮ ፡ እክህልኩ
 ፡ ነጽሮ ፡ ወስእንኩ ፡ ነጽሮ ፡ ዐይኑ ። ውእተ ፡ ጊዜ
 ፡ እቤ ፡ እፎ ፡ ግሩም ፡ ዝንቱ ፡ መካን ፡ ወሕማም
 ፡ ለነጽሮ ። ውእተ ፡ ጊዜ ፡ አውሥኦኒ ፡ ኡርኤል ፡
 ፩እመላእክት ፡ ቅዱሳን ፡ ዘምስሌየ ፡ ሀለወ ፡
 አውሥኦኒ ፡ ወይቤለኒ ፡ ሄኖክ ፡ ምንት ፡ ውእቱ ፡
 ፍርሃትከ ፡ ከመዝ ፡ ወድንጋዒከ ፡ በእንተዝ ፡ ግሩም ፡
 መካን ፡ ወቅድመ ፡ ገጹ ፡ ለዝ ፡ ሕማም ። ወይቤለኒ
 ፡ ዝመካን ፡ ቤተ ፡ ሞቅሖሙ ፡ ለመላእክት ፡ ወበህየ
 ፡ ይትአኀዙ ፡ እስከ ፡ ለዓለም ።

22 ወእምህየ ፡ ሖርኩ ፡ ካልአ ፡ መካነ ፡ ወአርአየኒ
 ፡ በምዕራብ ፡ ደብረ ፡ ዐቢየ ፡ ወነዋኅ ፡ ወከኩሕ ፡
 ጽኑዕ ፡ ወጃመካናት ፡ ሠናያት ፡ ወበውስቴቱ ፡ ዘበቱ ፡
 ዕሙቅ ፡ ወርኒብ ፡ ወልሙጽ ፡ ጥቀ ፡ ከመ ፡
 ልሙጽ ፡ ዘያንከራኸር ፡ ወዕሙቅ ፡ ወጽልመት ፡
 ለነጽሮ ፡ ውእተ ፡ ጊ ፡ ዜ ፡ አውሥኦኒ ፡ ሩፋኤል ፡
 ፩እመላእክት ፡ ቅዱሳን ፡ ዘሀለወ ፡ ምስሌየ ፡ ወይቤለኒ
 ፡ እላ ፡ መካናት ፡ ሠናያት ፡ ከመ ፡ ይትጋብኡ ፡
 ዲቤሆን ፡ መናፍስት ፡ ነፍሶሙ ፡ ለምውታን ፡ ሎሙ
 ፡ እሎንቱ ፡ ተፈጥሩ ፡ ዝየ ፡ ያስተጋብኡ ፡ ኩሎ ፡
 ነፍስ ፡ ውሉደ ፡ ሰብእ ፡ ወእሙንቱ ፡ መካናት ፡ ኀበ
 ፡ ያነብርዎሙ ፡ ገብሩ ፡ እስከ ፡ ዕለተ ፡ ኩነኒሆሙ ፡
 ወእስከ ፡ አመ ፡ ዕድሜሆሙ ፤ ወዕድሜ ፡ ውእቱ ፡
 ዐቢይ ፡ እስከ ፡ አመ ፡ ኩነኒ ፡ ዐቢይ ፡ በላዕሌሆሙ
 ፡ ወርኢኩ ፡ መናፍስተ ፡ ውሉደ ፡ ሰብእ ፡ እንዘ ፡
 ምውታን ፡ ውእቶሙ ፡ ወቃሎሙ ፡ ይበጽሕ ፡ እስከ
 ፡ ሰማይ ፡ ወይሰኪ ፡ ይእተ ፡ ጊዜ ፡ ተስእልክዎ ፡
 ለሩፋኤል ፡ መልአክ ፡ ዘሀሎ ፡ ምስሌየ ፡ ወእቤሎ ፡
 ዝመንፈስ ፡ ዘመኑ ፡ ውእቱ ፡ ዘከመዝ ፡ ቃሉ ፡
 ይበጽሕ ፡ ወይሰኪ ፡ ወአውሥኦኒ ፡ ወይቤለኒ ፡ እንዘ
 ፡ ይብል ፡ ዝንቱ ፡ መንፈስ ፡ ውእቱ ፡ ዘይወፅእ ፡
 እምአቤል ፡ ዘቀተሎ ፡ ቃየል ፡ እኑሁ ፡ ወይሰኪ ፡
 ኪያሁ ፡ እስከ ፡ ሶበ ፡ ይትጋጐል ፡ ዘርኡ ፡ እምገጸ
 ፡ ምድር ፡ ወእምዘርአ ፡ ሰብእ ፡ ይማስን ፡ ዘርኡ ፡
 ወበእንተዝ ፡ ውእተ ፡ ጊዜ ፡ ተስእልኩ ፡ በእንቲአሁ
 ፡ ወበእንተ ፡ ኩነኒ ፡ ኩሎ ፡ ወእቤ ፡ በእንተ ፡
 ምንት ፡ ተፈልጠ ፡ ፩እምነ ፡ ፩ ፡ ወአውሥኦኒ ፡
 ወይቤለኒ ፡ እሉ ፡ ቪተገብሩ ፡ ከመ ፡ ይፍልጡ ፡
 መንፈሶሙ ፡ ለምውታን ፤ ወከመዝ ፡ ተፈልጠ ፡
 ነፍሶሙ ፡ ለጻድቃን ፤ ዝውእቱ ፡ ነቅዐ ፡ ማይ ፡
 በላዕሌሁ ፡ ብርሃን ፡ በከመ ፡ ከማሁ ፡ ተፈጥረ ፡
 ለኃጥአን ፡ ሶበ ፡ ይመውቱ ፡ ወይትቀበሩ ፡ ውስተ ፡
 ምድር ፡ ወኩነኒ ፡ ኢኮነ ፡ በላዕሌሆሙ ፡ በሕይወቶሙ
 ፡ ወበዝየ ፡ ይትፈለጣ ፡ ነፍሳቲሆሙ ፡ ዲበ ፡ ዛቲ ፡
 ዐባይ ፡ ፃዕር ፡ እስከ ፡ አመ ፡ ዐባይ ፡ ዕለት ፡ እንተ
 ፡ ኩነኒ ፡ ወመቅሠፍት ፡ ወፃዕር ፡ ለእለ ፡ ይረግሙ ፡
 እስከ ፡ ለዓለም ፡ ወበቀል ፡ ለነፍሶሙ ፡ ወበህየ ፡
 የአሥሮሙ ፡ እስከ ፡ ለዓለም ፡ ወእመኒ ፡ ውእቱ ፡
 እምቅድመ ፡ ዓለም ፡ ወከመዝ ፡ ተፈልጠ ፡ ለነፍሶሙ
 ፡ ለእለ ፡ ይሰክዩ ፡ ወለእለ ፡ ያርእዩ ፡ በእንተ ፡
 ሕጉለት ፡ አመ ፡ ተቀትሉ ፡ በመዋዕለ ፡ ኃጥአን ፡
 ከመዝ ፡ ተፈጥረ ፡ ለነፍሶሙ ፡ ለሰብእ ፡ እለ ፡ ኢኮነ
 ፡ ጻድቃነ ፡ አላ ፡ ኃጥአነ ፡ እለ ፡ ፍጹማነ ፡ አበሳ ፡
 ወምስለ ፡ አባስያን ፡ ይከውኑ ፡ ከማሆሙ ፡
 ወነፍሶሙስ ፡ ኢትትቀተል ፡ በዕለተ ፡ ኩነኒ ፡
 ወኢይትነሥኡ ፡ እምዝየ ፡ ውእተ ፡ ጊዜ ፡ ባረከዎ ፡
 ለእግዚአ ፡ ስብሐት ፡ ወእቤ ፡ ቡሩክ ፡ ውእቱ ፡
 እግዚእየ ፡ እግዚአ ፡ ስብሐት ፡ ወጽድቅ ፡ ዘኩሎ ፡
 ይመልክ ፡ እስከ ፡ ለዓለም ፡

23 ወእምህየ ፡ ሖርኩ ፡ ካልአ ፡ መካነ ፡ መንገለ ፡
 ዓረብ ፡ እስከ ፡ አጽናፈ ፡ ምድር ። ወርኢኩ ፡ እሳተ ፡
 ፡ ዘይነድድ ፡ ወይረውፅ ፡ እንዘ ፡ ኢያዐርፍ ፡
 ወኢይነትግ ፡ እምሩጸቱ ፡ መዓልተ ፡ ወሌሊተ ፡ አላ ፡
 ፡ ከማሁመ ። ወተስእልኩ ፡ እንዘ ፡ እብል ፡ ዝንቱ ፡
 ምንት ፡ ውእቱ ፡ ዘአልቦ ፡ ዕረፍት ። ውእተ ፡ ጊዜ ፡
 ፡ አውሥኦኒ ፡ ራጉኤል ፡ ፩እምነ ፡ መላእክት ፡
 ቅዱሳን ፡ ዘሀሎ ፡ ምስሌየ ፡ ወይቤለኒ ፡ ዝንቱ ፡
 ዘርኢከ ፡ ሩጸተ ፡ ዘመንገለ ፡ ዐረብ ፡ እሳት ፡
 ዘይነድድ ፡ ውእቱ ፡ ኩሉ ፡ ብርሃናተ ፡ ሰማይ ።
 24 ወእምህየ ፡ ሖርኩ ፡ ካልአ ፡ መካነ ፡ ምድር ፡
 ወአርአየኒ ፡ ደብረ ፡ እሳት ፡ ዘያንበለብል ፡ መዓልተ ፡
 ፡ ወሌሊተ ። ወሖርኩ ፡ መንገሌሁ ፡ ወርኢኩ ፡
 ፯አድባረ ፡ ክቡራነ ፡ ወኩሉ ፡ ፩እምነ ፡ ፩እንዘ ፡
 ይትዌለጥ ፡ ወአዕባነ ፡ ክቡራነ ፡ ወሠናያነ ፡ ወኩሉ ፡
 ክቡር ፤ ወስብሕ ፡ ራእዮሙ ፡ ወሠናይ ፡ ገጽሙ ፡
 ፫መንገለ ፡ ጽባሕ ፡ ወጽኑዓን ፡ ፩ዲበ ፡ ፩ወ፫መንገለ ፡
 ሰሜን ፡ ወጽኑዓን ፡ ፩ዲበ ፡ ፩ወቁላተ ፡ ዕሙቃተ ፡
 ወጠዋያተ ፡ አሐቲ ፡ ለአሐቲ ፡ እይትቃረባ ። ወሳብዕ ፡
 ፡ ደብር ፡ ማእከሎሙ ፡ ለእሎንቱ ፡ ወኑኖሙሰ ፡
 ይትማሰሉ ፡ ኩሎሙ ፡ ከመ ፡ መንበረ ፡ አትሮንስ ፡
 ወየዐውድዎ ፡ ዕፀወ ፡ መዐዛ ። ወሀሎ ፡ ውስቴቶሙ ፡
 ዕፅ ፡ አልቦ ፡ ግሙራ ፡ አመ ፡ ዪነወኒ ፡ ወኢ ፡
 ፩እምውስቴቶሙ ፡ ወባዕዳንሂ ፡ ዘከማሁ ፡ ኢኮነ ፡
 ዘይምዕዝ ፡ እምኩሉ ፡ መዐዛ ፡ ወቁጽሉ ፡ ወጽጌሁ ፡
 ወዕፁ ፡ ኢይጸመሂ ፡ ለዓለም ፡ ወፍሬሆኒ ፡ ሠናይ ፤
 ወፍሬሆሰ ፡ ከመ ፡ አስካለ ፡ በቀልት ። ወውእተ ፡
 ጊዜ ፡ እቤ ፡ ነዋ ፡ ዝንቱ ፡ ሠናይ ፡ ዕፅ ፡ ወሠናይ ፡
 ለርእይ ፡ ወአዳም ፡ ቁጽሉ ፡ ወፍሬሆኒ ፡ ሞገስ ፡
 ጥቀ ፡ ለርእየ ፡ ገጽ ። ወውእተ ፡ ጊዜ ፡ አውሥኦኒ ፡
 ሚካኤል ፡ ፩እምነ ፡ መላእክት ፡ ቅዱሳን ፡ ወክቡራን ፡
 ፡ ዘምስሌየ ፡ ሀሎ ፡ ውእቱ ፡ ዘዲቤሆሙ ።

25 ወይቤለኒ ፡ ሄኖክ ፡ ምንተ ፡ ትሴአለኒ ፡ በእንተ
 ፡ መዐዛሁ ፡ ለዝ ፡ ዕፅ ፡ ወትጤይቅ ፡ ከመ ፡
 ታእምር ። ወውእተ ፡ ጊዜ ፡ አውሣእክዎ ፡ አነ ፡
 ሄኖክ ፡ እንዘ ፡ እብል ፡ በእንተ ፡ ኩሉ ፡ እፈቅድ ፡
 አእምር ፡ ወፈድፋደስ ፡ በእንተዝ ፡ ዕፅ ። ወአውሥአኒ
 ፡ እንዘ ፡ ይብል ፡ ዝንቱ ፡ ደብር ፡ ዘርኢከ ፡ ነዊኅ
 ፡ ዘርእሱ ፡ ይመስል ፡ መንበሮ ፡ ለእግዚእ ፡ መንበሩ
 ፡ ውእቱ ፡ ኀበ ፡ ይነብር ፡ ቅዱስ ፡ ወዐቢይ ፡
 እግዚአ ፡ ስብሐት ፡ ንጉሥ ፡ ዘለዓለም ፡ ሶበ ፡
 ይወርድ ፡ የሐውጻ ፡ ለምድር ፡ በሠናይ ። ወዝንቱኒ ፡
 ዕፅ ፡ መዐዛ ፡ ሠናይ ፡ ወኢ፩ ፡ ዘሥጋ ፡ አልቦ ፡
 ሥልጣን ፡ ከመ ፡ ይግሥዎ ፡ እስከ ፡ አመ ፡ ዐቢይ ፡
 ኩነኔ ፡ አመ ፡ ይትቤቀል ፡ ኩሎ ፡ ወይትፌጸም ፡
 እስከ ፡ ለዓለም ፡ ዝኩ ፡ ለጻድቃን ፡ ወለትሑታን ፡
 ይትወሀብ ። እምፍሬ ፡ ዚአሁ ፡ ይትወሀብ ፡ ለኅሩያን
 ፡ ሕይወት ፡ መንገለ ፡ መስዕ ፡ ይተከል ፡ ውስተ ፡
 መካን ፡ ቅዱስ ፡ መንገለ ፡ ቤቱ ፡ ለእግዚእ ፡ ንጉሥ
 ፡ ዘለዓለም ። ውእተ ፡ ጊዜ ፡ ይትፌሥሑ ፡ በፍሥሐ
 ፡ ወይትሐሠዩ ፡ ውስተ ፡ ቅዱስ ፡ ያበውኡ ፡ ሎቱ ፡
 መዐዛ ፡ በበአዕፅምቲሆሙ ፡ ወሕይወተ ፡ ብዙኃ ፡
 የሐይወ ፡ በዲበ ፡ ምድር ፡ በከመ ፡ ሐይወ ፡ አበዊከ
 ፡ ወበመዋዕሊሆሙ ፡ ኀዘን ፡ ወሕማም ፡ ወጻማ ፡
 ወመቅሠፍት ፡ እይገሥዎሙ ። ውእተ ፡ ጊዜ ፡ ባረክዎ
 ፡ ለእግዚአ ፡ ስብሐት ፡ ንጉሥ ፡ ዘለዓለም ፡ እስመ
 ፡ አስተዳለወ ፡ ከመዝ ፡ ለሰብእ ፡ ጻድቃን ፡ ወከመዝ
 ፡ ፈጠረ ፡ ወይቤ ፡ የሀብዎሙ ።

26 ወእምህየ ፡ ሖርኩ ፡ ማእከለ ፡ ምድር ፡
 ወርኢኩ ፡ መካነ ፡ ቡሩክ ፡ ወጥሉለ ፡ ዘቦቱ ፡ አዕፅቅ
 ፡ ዘይነብር ፡ ወይሠርፅ ፡ እምዕፅ ፡ ዘተመትረ ። ወበህየ
 ፡ ርኢኩ ፡ ደብረ ፡ ቅዱስ ፡ ወመትሕተ ፡ ደብር ፡
 ማይ ፡ ዘመንገለ ፡ ጽባሑ ፡ ወውኀዘቱ ፡ መንገለ ፡
 ሰሜን ። ወርኢኩ ፡ መንገለ ፡ ጽባሕ ፡ ካልአ ፡ ደብረ
 ፡ ዘይነውኅ ፡ ከመዝ ፡ ወማእከሎሙ ፡ ቈላ ፡ ዕሙቅ
 ፡ ወአልቦ ፡ ራኅብ ፡ ወላቲኒ ፡ የሐውር ፡ ማይ ፡
 መንገለ ፡ ደብር ፡ ወመንገለ ፡ ዐረቡ ፡ ለዝ ፡ ካልእ ፡
 ደብር ፡ ወይቴሐቶ ፡ ሎቱ ፡ ወአልቦ ፡ ኑኅ ፡ ወቈላ ፡
 ታሕቱ ፡ ማእከሎሙ ፡ ወካልአት ፡ ቈላት ፡ ዕሙቃት
 ፡ ወይቡሳት ፡ መንገለ ፡ ጽንፈ ፡ ሠለስቲሆሙ ።
 ወኩሉ ፡ ቈላቱ ፡ ዕሙቃት ፡ ወአልቦን ፡ ራኅብ ፡
 እምኩኩሕ ፡ ጽኑዕ ፤ ወዕፅ ፡ ይተከል ፡ በላዕሌሆሙ ።
 ወአንከርኩ ፡ በእንተ ፡ ኩኩሕ ፡ ወአንከርኩ ፡ በእንተ
 ፡ ቈላ ፡ ወጥቀ ፡ አንከርኩ ።

27 ውእተ ፡ ጊዜ ፡ እቤ ፡ በእንተ ፡ ምንት ፡ ዛቲ ፡ ምድር ፡ ቡርክት ፡ ወኸለንታሃ ፡ ዕፀወ ፡ ምልዕት ፡ ወዛቄላ ፡ ርግምት ፡ ማእከሎም ፡ ውእተ ፡ ጊዜ ፡ አውሥአኒ ፡ ኡራኤል ፡ ፩እመላእክት ፡ ቅዱሳን ፡ ዘሀሎ ፡ ምስሌየ ፡ ወይቤለኒ ፡ ዛቄላ ፡ ርግምት ፡ ለርጉማን ፡ እስከ ፡ ለዓለም ፤ ዝየ ፡ ይትጋብኡ ፡ ኸሎም ፡ እለ ፡ ይብሉ ፡ በአፋሆም ፡ ላዕለ ፡ እግዚአብሔር ፡ ቃለ ፡ ዘኢይደሉ ፡ ወበእንተ ፡ ስብሐተ ፡ ዚአሁ ፡ ይትናገሩ ፡ ዕፁባተ ፡ ዝየ ፡ ያስተጋብእዎም ፡ ወዝየ ፡ ምክናኖም ፡ ወበደጋሪ ፡ መዋዕል ፡ ይከውን ፡ ላዕሌሆም ፡ አርአያ ፡ ኸነኔ ፡ ዘበጽድቅ ፡ በቅድመ ፡ ጻድቃን ፡ ለዓለም ፡ ኸሎ ፡ መዋዕለ ፡ በዝየ ፡ ይባርክዎ ፡ መሀርያን ፡ ለእግዚአ ፡ ስብሐት ፡ ንጉሥ ፡ ዘለዓለም ፡ ወበመዋዕለ ፡ ኸነኔሆም ፡ ይባርክዎ ፡ በምሕረት ፡ በከመ ፡ ከፈሎም ፡ ውእተ ፡ ጊዜ ፡ አነኒ ፡ ባረክዎ ፡ ለእግዚአ ፡ ስብሐት ፡ ወነገርኩ ፡ ሎቱ ፡ ወዘከርኩ ፡ በከመ ፡ ይደሉ ፡ ለዕቦዩ ፡

28 ወእምህየ ፡ ሖርኩ ፡ መንገለ ፡ ጽባሕ ፡ ማእከላ ፡ ለደብረ ፡ መድበራ ፡ ወርኢክዎ ፡ ገዳመ ፡ ባሕቲቶ ፡ ወባሕቱ ፡ ምሉእ ፡ ዕፀወ ፡ እምነ ፡ ዝንቱ ፡ ዘርእ ፡ ወማይ ፡ እምላዕሉ ፡ ይፈለፍል ፡ በላዕሉ ፡ ያስተርኢ ፡ አስራብ ፡ ከመ ፡ ብዙኅ ፡ ዘይሰርብ ፡ ከመ ፡ መንገለ ፡ መስዕ ፡ መንገለ ፡ ዐረብ ፡

29 ወሖርኩ ፡ ውስተ ፡ መካን ፡ ካልእ ፡ እምነ ፡ መድበራ ፡ መንገለ ፡ ጽባሖ ፡ ለውእቱ ፡ ደብር ፡ ቀረብኩ ፡ ወበህየ ፡ ርኢኩ ፡ ዕፀወ ፡ ኸነኔ ፡ ፈድፋደ ፡ ቈስቈስ ፡ መዐዛ ፡ ለስኂን ፡ ወከርቤ ፡ ወዕፀወኒ ፡ ኢይትማሰሉ ፡

30 ወላዕሌሁ ፡ ላዕለ ፡ እላንቱ ፡ ላዕለ ፡ ደብረ ፡ ጽባሕ ፡ ወአኮ ፡ ርኑቅ ፡ ወርኢኩ ፡ መካነ ፡ ካልአ ፡ ቈላተ ፡ ማይ ፡ ከመ ፡ ዘኢይትዌዳዕ ፡ ወርኢኩ ፡ ዕፀ ፡ ሠናየ ፡ ወመዐዛሁ ፡ ከመ ፡ ዘሰኪኖን ፡ ወመንገለ ፡ ክነፊሆም ፡ ለቈላት ፡ እሎንቱ ፡ ርኢኩ ፡ ቀናንሞስ ፡ ዘመዐዛ ፡ ወዲበ ፡ እልክቱ ፡ ቀረብኩ ፡ ዘመንገለ ፡ ጽባሕ ፡

31 ወርኢኩ ፡ ካልአ ፡ ደብረ ፡ ዘቦቱ ፡ ዕፀው ፡ ወይወፅእ ፡ ማይ ፡ ወይወፅእ ፡ እምኔሁ ፡ ከመ ፡ ኔቄጥሮ ፡ ዘስመ ፡ ሳሪራ ፡ ወክልበኔን ፡ ወዲበ ፡ ውእቱ ፡ ደብር ፡ ርኢኩ ፡ ደብረ ፡ ካልአ ፡ ወውስቱቱ ፡ ዕፀው ፡ ዘዓልዋ ፡ ወእልኩ ፡ ዕፀው ፡ ምሉአን ፡ ዘከመ ፡ ከርካዕ ፡ ወጽኑዕ ፡ ወሶበ ፡ ይነሥእዎ ፡ ለውእቱ ፡ ፍሬ ፡ ይኔይስ ፡ እምኸሉ ፡ አፈው ፡

32 ወእምድኅረ ፡ እሉ ፡ አፈው ፡ ለመስዕ ፡ እንዘ ፡
 እኔጽር ፡ መልዕልተ ፡ አድባር ፡ ርኢኩ ፡ ጌአድባረ ፡
 ምሉዓነ ፡ ሰንበልት ፡ ቅድወ ፡ ወዕፀወ ፡ መዐዛ ፡
 ወቀናንሞን ፡ ወፕፕረ ፡ ወእምህየ ፡ ሖርኩ ፡
 መልዕልተ ፡ ርእሶሙ ፡ ለእልኩ ፡ አድባ ፡ ር ፡ እንዘ
 ፡ ርጉቅ ፡ ውእቱ ፡ ለጽባሕ ፡ ወኅለፍኩ ፡ እንተ ፡
 ዲበ ፡ ባሕረ ፡ ኤርትራ ፡ ወእምኔሁ ፡ ርጉቀ ፡ ኮንኩ
 ፡ ወኅለፍኩ ፡ መልዕልቶ ፡ ለመልአክ ፡ ዙጥኤል ፡
 ወመጻእኩ ፡ ውስተ ፡ ገነተ ፡ ጽድቅ ፡ ወርኢኩ ፡
 ካሐካሐቲሆሙ ፡ ለእልክቱ ፡ ዕፀው ፡ ዕፀወ ፡ ብዙኃነ
 ፡ ወዐቢያነ ፡ ይበቀሉ ፡ በህየ ፡ ወእንዘ ፡ ዒናሆሙ ፡
 ሠናይ ፡ ዐቢያን ፡ ወስኖሙ ፡ ብዙኅ ፡ ወስቡሓን ፡
 ወዕፀ ፡ ጥበብ ፡ ዘእምኔሁ ፡ በሊዖሙ ፡ የአምርዋ ፡
 ለጥበብ ፡ ዐባይ ፡ ወይመስል ፡ ሐመረ ፡ ጽራእ ፡
 ወፍሬሁ ፡ ከመ ፡ አስካለ ፡ ወይን ፡ ጥቀ ፡ ሠናይ ፡
 ወዒናሁ ፡ ለውእቱ ፡ ዕፅ ፡ የሐውር ፡ ወይበጽሕ ፡
 ነዊኃ ፡ ወእቤ ፡ ሠናይ ፡ ዝዕፅ ፡ ወከመ ፡ ሠናይ ፡
 ወፍሠሕ ፡ ርእየቱ ፡ ወአውሥአኒ ፡ መልአክ ፡ ቅዱስ
 ፡ ሩፋኤል ፡ ዘምስሌየ ፡ ሀሎ ፡ ወይቤለኒ ፡ ዝውእቱ ፡
 ዕፀ ፡ ጥበብ ፡ ዘእምኔሁ ፡ በልዑ ፡ አቡከ ፡ አረጋዊ ፡
 ወእምከ ፡ እቤራዊት ፡ እለ ፡ ቀደሙከ ፡ ወአእመርዋ
 ፡ ለጥበብ ፡ ወተፈትሐ ፡ አዕይንቲሆሙ ፡ ወአእመሩ ፡
 ከመ ፡ ዕራቃኒሆሙ ፡ ሀለዉ ፡ ወተሰዱ ፡ እምገነት ፡
 33 ወእምህየ ፡ ሖርኩ ፡ እስከ ፡ አጽናፈ ፡ ምድር ፡
 ወርኢኩ ፡ በህየ ፡ አራዊተ ፡ ዐበይተ ፡ ወይትዌለጥ ፡
 ፩እምካልኡ ፤ ወአዕዋፍሂ ፡ ይትዌለጥ ፡ ገጽም ፡
 ወስኖሙ ፡ ወቃሎሙሂ ፡ ይትዌለጥ ፡ ፩እምካልኡ ፡
 ወበጽባሐሙ ፡ ለእሉ ፡ አራዊት ፡ ርኢኩ ፡ አጽናፈ ፡
 ምድር ፡ በኅበ ፡ ሰማይ ፡ ያዐርፍ ፡ ወኅዋኅው ፡ ሰማይ
 ፡ ርኃተ ፡ ወርኢኩ ፡ እፎ ፡ ይወፅኡ ፡ ከዋክብተ ፡
 ሰማይ ፡ ወኅሉለቁ ፡ ዘእምነ ፡ ይወፅኡ ፡ ኅዋኅው ፡
 ወጸሐፍኩ ፡ ኩሎ ፡ ሙጻሐሙ ፡ ለለ፩በኅልቆሙ ፤
 ወአስማቲሆሙ ፤ በደርኅሙ ፤ ወምንባሮሙ ፤
 ወጊዜሆሙ ፤ ወአውራኒሆሙ ፤ በከመ ፡ አርአየኒ ፡
 መልአክ ፡ ኡርኤል ፡ ዘምስሌየ ፡ ሀሎ ፡ ወኩሎ ፡
 አርአየኒ ፡ ሊተ ፡ ወጸሐፎ ፤ ወዓዲ ፡ አስማቲሆሙ ፡
 ጸሐፈ ፡ ሊተ ፡ ወትእዛባቲሆሙ ፡ ወምግባራቲሆሙ ፡
 34 ወእምህየ ፡ ሖርኩ ፡ መንገለ ፡ መስዕ ፡ በአጽናፈ
 ፡ ምድር ፡ ወበህየ ፡ ርኢኩ ፡ መንክረ ፡ ዐቢየ ፡
 ወስቡሐ ፡ በአጽናፊሃ ፡ ለኩላ ፡ ምድር ፡ ወበህየ ፡
 ርኢኩ ፡ ኅዋኅው ፡ ሰማይ ፡ ፍቱሐተ ፡ በሰማይ ፡
 ቪበበ፩እምኔሆሙ ፡ ይወጽኡ ፡ ነፋሳት ፡ በመንገለ ፡
 መስዕ ፡ ሶበ ፡ ይነፍሕ ፡ ቑር ፡ ወበረድ ፡ ወአስሐትያ
 ፡ ወሐመዳ ፡ ወጠል ፡ ወዝናም ፡ ወእምአሐቲ ፡
 ኅኅተ ፡ በሠናይ ፡ ይነፍህ ፡ ወሶበ ፡ በ፪ሆሙ ፡
 ኅዋኅው ፡ ይነፍሱ ፡ በኅይል ፡ ወበዓዕር ፡ ይከውን ፡
 ዲበ ፡ ምድር ፡ ወበኅይል ፡ ይነፍሱ ፡
 35 ወእምህየ ፡ ሖርኩ ፡ መንገለ ፡ ዐረብ ፡ በአጽናፈ
 ፡ ምድር ፡ ወርኢኩ ፡ በህየ ፡ ቪኅዋኅው ፡ ርኃተ ፡
 በከመ ፡ ርኢኩ ፡ በምሥራቅ ፡ በአምጣነ ፡ ኅዋኅው ፡
 ወበአምጣነ ፡ ሙፃአቱ ፡

36 ወእምህየ ፡ ሖርኩ ፡ መንገለ ፡ አዜብ ፡ በአጽናፈ
፡ ምድር ፡ ወበህየ ፡ ርኢኩ ፡ ቪኅዋኅው ፡ ሰማይ ፡
ርኃተ ፡ ወይወፅእ ፡ እምህየ ፡ አዜብ ፡ ወጠል ፡
ወዝናም ፡ ወነፋስ ፡ ወእምህየ ፡ ሖርኩ ፡ መንገለ ፡
ጽባሕ ፡ በአጽናፈ ፡ ሰማይ ፡ ወበህየ ፡ ርኢኩ ፡
ቪኅዋኅው ፡ ሰማይ ፡ ርኃተ ፡ መንገለ ፡ ጽባሕ ፡
ወላዕሌሆሙ ፡ ኅዋኅው ፡ ንዑሳን ፡ በበ ፡ ፩እምእልኩ
፡ ኅዋኅው ፡ ንዑሳን ፡ የኅልፉ ፡ ከዋክብተ ፡ ሰማይ ፡
ወየሐውሩ ፡ ምዕራብ ፡ በፍኖት ፡ እንተ ፡ ተርእየት ፡
ሎሙ ፡ ወሶበ ፡ ርኢኩ ፡ ባረኩ ፡ ወበኩሉ ፡ ጊዜ ፡
እባርኮ ፡ ለእግዚአ ፡ ስብሐት ፡ ዘገብረ ፡ ተአምራተ ፡
ዐቢያነ ፡ ወስቡሓነ ፡ ከመ ፡ ያርኢ ፡ ዕበየ ፡ ግብሩ ፡
ለመላእክቲሁ ፡ ወለነፍሳተ ፡ ሰብእ ፡ ከመ ፡ ይሰብሐ
፡ ግብሮ ፡ ወኩሉ ፡ ተግባሩ ፡ ከመ ፡ ይርአዩ ፡ ግብረ
፡ ኅይሉ ፡ ወይሰብሕዎ ፡ ለግብረ ፡ እደዊሁ ፡ ዐቢይ
፡ ወይባርክዎ ፡ እስከ ፡ ለዓለም ፡

37 ራእይ ፡ ዘርእየ ፡ ካልአ ፡ ራእየ ፡ ጥበብ ፡
ዘርእየ ፡ ሄኖክ ፡ ወልደ ፡ ያሬድ ፡ ወልደ ፡
መላልኤል ፡ ወልደ ፡ ቃይናን ፡ ወልደ ፡ ሄኖስ ፡
ወልደ ፡ ሴት ፡ ወልደ ፡ አዳም ፡ ወዝርእሱ ፡ ለነገረ
፡ ጥበብ ፡ ዘአንሣእኩ ፡ እትናገር ፡ ወእብል ፡ ለእለ ፡
የኅድሩ ፡ ዲበ ፡ የብስ ፡ ስምዑ ፡ ቀደምት ፡ ወርእዩ
፡ ደኃርያን ፡ ነገረ ፡ ቅዱስ ፡ እለ ፡ እነግር ፡ ቅድመ
፡ እግዚአ ፡ መናፍስት ፡ እሉ ፡ ቀዳሚ ፡ ይኅይስ ፡
ብሂል ፡ ወደኃርያንሂ ፡ ኢንከልእ ፡ ርእሳ ፡ ለጥበብ ፡
እስከ ፡ ይእዜ ፡ ኢተውህበኒ ፡ እምቅድመ ፡ እግዚአ ፡
መናፍስት ፡ ዘነሣእኩ ፡ ጥበበ ፡ በከመ ፡ ሀለይኩ ፡
በከመ ፡ ፈቀደ ፡ እግዚአ ፡ መናፍስት ፡ ዘተውህበኒ ፡
እምኔሁ ፡ ክፍለ ፡ ሕይወት ፡ ዘለዓለም ፡ ወኮኑ ፡ ብየ
፡ ቪምሳሌ ፡ ወአነ ፡ አንሣእኩ ፡ እንዘ ፡ እብሎሙ ፡
ለእለ ፡ የኅድሩ ፡ የብስ ፡

38 ምሳሌ ፡ ቀዳሚ ፡ ሶበ ፡ ያስተርኢ ፡ ማኅበረ ፡
ጳድቃን ፡ ወይትኳነኑ ፡ ኃጥአን ፡ በኅጢአቶሙ ፡
ወእምገጸ ፡ የብስ ፡ ይትሀወኩ ፡ ወሶበ ፡ ያስተርኢ ፡
ጳድቅ ፡ በገጸሙ ፡ ለጳድቃን ፡ እለ ፡ ኅሩያን ፡
ተግባሮሙ ፡ ስቁል ፡ በእግዚአ ፡ መናፍስት ፡
ወያስተርኢ ፡ ብርሃን ፡ ለጳድቃን ፡ ወለኅሩያን ፡ እለ
፡ የኅድሩ ፡ ዲበ ፡ የብስ ፡ አይቴ ፡ ማኅደረ ፡ ኃጥአን
፡ ወአይቴ ፡ ምዕራፎሙ ፡ ለእለ ፡ ክህድዎ ፡ ለእግዚአ
፡ መናፍስት ፡ እምኅየሶሙ ፡ ሶበ ፡ ኢተወልዱ ፡
ወሶበ ፡ ይትከሠታ ፡ ኅቡአቲሆሙ ፡ ለጳድቃን ፡
ይትኳነኑ ፡ ኃጥአን ፡ ወይትሀወኩ ፡ ረሲዓን ፡ እምገጸ
፡ ጳድቃን ፡ ወኅሩያን ፡ ወእምይእዜ ፡ ኢይከውኑ ፡
አዚዛነ ፡ ወኢልዑላነ ፡ እለ ፡ ይእኅዝዋ ፡ ለምድር ፡
ወኢይክሉ ፡ ርእየ ፡ ገጸ ፡ ቅዱሳን ፡ እስመ ፡
ለእግዚአ ፡ መናፍስት ፡ ተርእየ ፡ ብርሃኑ ፡ ለገጸ ፡
ቅዱሳን ፡ ወጳድቃን ፡ ወኅሩያን ፡ ወነገሥት ፡ አዚዛን
፡ በውእቱ ፡ ጊዜ ፡ ይትኃጐሉ ፡ ወይትወሀቡ ፡ ውስተ
፡ እደ ፡ ጳድቃን ፡ ወቅዱሳን ፡ ወእምህየ ፡ አልበ ፡
ዘያስተምህር ፡ ኅበ ፡ እግዚአ ፡ መናፍስት ፡ እስመ ፡
ተወድአ ፡ እንቲአሆሙ ፡ ሕይወት ፡

39 ወይከውን : በዝንቱ : መዋዕል : ይወርዱ :
 ደቂቅ : ጎሩያን : ወቅዱሳን : እምልዑላን : ሰማያት
 : ወ፩ : ይከውን : ዘርአሙ : ምስለ : ውሉደ :
 ሰብእ ። በውእቱ : መዋዕል : ነሥአ : ሄኖክ :
 መጻሕፍተ : ቅንዕት : ወመዐት : ወመጻሕፍተ :
 ጉጉዓ : ወሀውክ : ወምሕረት : ኢይከውን :
 ላዕሌሆሙ : ይቤ : እግዚአ : መናፍስት ። ወበውእቱ
 : ጊዜ : መሠጠኒ : ደመና : ወዐውሎ : ነፋስ :
 እምገጻ : ለምድር : ወአንበረኒ : ውስተ : ጽንፈ :
 ሰማያት ። ወበህየ : ርኢኩ : ራእየ : ካልአ :
 ማኅደሪሆሙ : ለጻድቃን : ወምስካባቲሆሙ : ለቅዱሳን
 ። በህየ : ርእያ : አዕይንትየ : ማኅደሪሆሙ : ምስለ :
 መላእክት : ወምስካባቲሆሙ : ምስለ : ቅዱሳን :
 ወይስእሉ : ወያስተበቅዑ : ወይጼልዩ : በእንተ :
 ውሉደ : ሰብእ : ወጽድቅ : ከመ : ማይ : ይውሕዝ
 : በቅድሜሆሙ : ወምሕረት : ከመ : ጠል : ውስተ
 : ምድር ፤ ከመዝ : ውእቱ : ማእከሎሙ : ለዓለመ :
 ዓለም ። ወበውእቱ : መዋዕል : ርእያ : አዕይንትየ :
 መካነ : ጎሩያን : ዘጽድቅ : ወዘሃይማኖት : ወጽድቅ
 : ይከውን : በመዋዕሊሆሙ : ወጻድቃን : ወጎሩያን :
 ጉልቀ : አልቦሙ : ቅድሜሁ : ለዓለመ : ዓለም ።
 ወርኢኩ : ማኅደሪሆሙ : መትሕተ : አክናፈ :
 እግዚአ : መናፍስት : ወኩሎሙ : ጻድቃን : ወጎሩያን
 : በቅድሜሁ : ይትለሐዩ : ከመ : ብርሃነ : እሳት :
 ወአፋሆሙ : ይመልእ : በረከተ : ወከናፍሪሆሙ :
 ይሴብሑ : ስሞ : ለእግዚአ : መናፍስት : ወጽድቅ :
 ቅድሜሁ : ኢየሳልቅ ። ህየ : ፈቀድኩ : እኅድር :
 ወፈተወቶ : ነፍስየ : ለውእቱ : ማኅደር : በህየ : ኮነ
 : ክፍልየ : ቅድመ : እስመ : ከመዝ : ጸንዐ :
 በእንቲአየ : በቅድመ : እግዚአ : መናፍስት ።
 ወበውእቶን : መዋዕል : ሰባሕኩ : ወአልዓልኩ : ስሞ
 : ለእግዚአ : መናፍስት : በረከተ : ወስብሐተ :
 እስመ : ውእቱ : አጽንዐኒ : በበረከት : ወስብሐት :
 በከመ : ፈቃዱ : ለእግዚአ : መናፍስት ። ወጉንዱየ :
 ርእያ : አዕይንትየ : በውእቱ : መካነ : ወባረክዎ :
 እንዘ : እብል : ቡሩክ : ውእቱ : ወይትባረክ :
 እምቅድም : ወእስከ : ለዓለም ። ወበቅድሜሁ : አቦ
 : ማኅለቅት : ውእቱ : ያኦምር : ዘእንበለ :
 ይትፈጠር : ዓለም : ምንት : ውእቱ : ዓለም :
 ወለትውልደ : ትውልድ : ዘይከውን ። ይባርኩከ : እለ
 : ኢይነውሙ : ወይቀውሙ : በቅድመ : ስብሐቲከ :
 ወይባርኩከ : ወይሴብሑ : ወያሌዕሉ : እንዘ : ይብሉ
 : ቅዱስ : ቅዱስ : ቅዱስ : እግዚአ : መናፍስት :
 ይመልእ : ምድረ : መንፈሳት ። ወበህየ : ርእያ :
 አዕይንትየ : ኩሎ : እለ : ኢይነውሙ : ይቀውሙ :
 ቅድሜሁ : ወይባርኩ : ወይብሉ : ቡሩክ : አንተ :
 ወቡሩክ : ስሙ : ለእግዚእ : ለዓለመ : ዓለም ።
 ወተወለጠ : ገጽየ : እስከ : ስእንኩ : ነጽሮ ።

40 ወርኢኩ ፡ እምድጎረዝ ፡ አእላፈ ፡ አእላፍት ፡
 ወትእልፊት ፡ ትእልፊት ፡ ወአልበሙ ፡ ጉልቀ ፡
 ወሐሳብ ፡ እለ ፡ ይቀውሙ ፡ ቅድመ ፡ ስብሐተ ፡
 እግዚአ ፡ መናፍስት ፡ ርኢኩ ፡ ወበፀክነፊሁ ፡
 ለእግዚአ ፡ መናፍስት ፡ ርኢኢኩ ፡ ፬፻፳ ፡ ካልአ ፡
 እምእለ ፡ ይቀውሙ ፡ ወአስማቲሆሙ ፡ አእመርኩ ፡
 ዘአይድዐኒ ፡ አስማቲሆሙ ፡ መልአክ ፡ ዘመጽአ ፡
 ምስሌየ ፡ ወኹሎ ፡ ጎቡአተ ፡ አርአየኒ ፡ ወሰማዕኩ ፡
 ቃሎሙ ፡ ለእልኩ ፡ ፬፻፳ ፡ እንዘ ፡ ይሴብሑ ፡
 ቅድመ ፡ እግዚአ ፡ ስብሐት ፡ ቃል ፡ ቀዳማዊ ፡
 ይባርኩ ፡ ለእግዚአ ፡ መናፍስት ፡ ለዓለመ ፡ ዓለም ፡
 ወቃለ ፡ ካልአ ፡ ሰማዕኩ ፡ እንዘ ፡ ይባርኩ ፡ ለኅሩይ
 ፡ ወለኅሩያን ፡ እለ ፡ ስቁላን ፡ በእግዚአ ፡ መናፍስት
 ፡ ወሣልስ ፡ ቃለ ፡ ሰማዕኩ ፡ እንዘ ፡ ይስእሉ ፡
 ወይጼልዩ ፡ በእንተ ፡ እለ ፡ የኅድሩ ፡ ውስተ ፡ የብስ
 ፡ ወያስተበቀሁ ፡ በስሙ ፡ ለእግዚአ ፡ መናፍስት ፡
 ወቃለ ፡ ራብዐ ፡ ሰማዕኩ ፡ እንዘ ፡ ይሰድዶሙ ፡
 ለሰይጣናት ፡ ወኢየኅድጎሙ ፡ ይባኡ ፡ ጎበ ፡ እግዚአ
 ፡ መናፍስት ፡ ከመ ፡ ያስተዋድይዎሙ ፡ ለእለ ፡
 የኅድሩ ፡ ዲበ ፡ የብስ ፡ ወእምድጎረዝ ፡ ተስእልክዎ
 ፡ ለመልአክ ፡ ሰላም ፡ ዘየሐውር ፡ ምስሌየ ፡ ዘውእቱ
 ፡ አርአየኒ ፡ ኹሎ ፡ ዘጎቡእ ፡ ወእቤሎ ፡ መኑ ፡
 ውእቶሙ ፡ እሉ ፡ ፬፻፳ ፡ ዘርኢኩ ፡ ወእለ ፡ ሰማዕኩ
 ፡ ቃሎሙ ፡ ወጸሐፍክዎሙ ፡ ወይቤለኒ ፡ ዝቀዳማዊ ፡
 ውእቱ ፡ መሐሪ ፡ ወርጉቀ ፡ መዓት ፡ ቅዱስ ፡
 ሚካኤል ፤ ወካልእ ፡ ዘዲበ ፡ ኹሎ ፡ ሕማም ፡ ወዲበ
 ፡ ኹሎ ፡ ቍስል ፡ ዘውሉደ ፡ ሰብእ ፡ ውእቱ ፡
 ሩፋኤል ፤ ወሣልስ ፡ ዘዲበ ፡ ኹሎ ፡ ኃይል ፡ ውእቱ
 ፡ ቅዱስ ፡ ገብርኤል ፤ ወራብዕ ፡ ዘዲበ ፡ ንስሓ ፡
 ወለተስፋ ፡ እለ ፡ ይወርሱ ፡ ሕይወተ ፡ ዘለዓለም ፡
 ውእቱ ፡ ፋኑኤል ፡ ወእሉ ፡ ፬መላእክቲሁ ፡
 ለእግዚአብሔር ፡ ልዑል ፡ ወ፶ቃለ ፡ ሰማዕኩ ፡
 በውእቶን ፡ መዋዕል ፡

41 ወእምድኅረዝ : ርኢኩ : ኩሎ : ኅብአቲሆሙ :
 ለሰማያት : ወመንግሥት : እፎ : ትትከፈል :
 ወተግባረ : ሰብእ : ከመ : በመዳልው : ይደለዉ ።
 በህየ : ርኢኩ : ማኅደሪሆሙ : ለኅሩያን :
 ወማኅደሪሆሙ : ለቅዱሳን : ወርእያ : አዕይንትየ :
 በህየ : ኩሎሙ : ኃጥአን : እንዘ : ይሰደዱ : እምህየ
 : እለ : ይክህድዎ : ለስመ : እግዚአ : መናፍስት :
 ወይስሕብዎሙ : ወቀዊም : አልቦሙ : በመቅሠፍት :
 እንተ : ትወጽእ : እምእግዚአ : መናፍስት ። ወበህየ
 : ርእያ : አዕይንትየ : ኅቡአተ : መባርቅት :
 ወነጐድጓድ : ወኅቡአተ : ነፋሳት : እፎ : ይትከፈሉ
 : ከመ : ይንፍሑ : ዲበ : ምድር : ወኅቡአተ :
 ደመናት : ወጠል : ወበህየ : ርኢኩ : እምኅበ :
 ይወጽእ : በውእቱ : መካን : ወእምህየ : ይጸግቡ :
 ፀበለ : ምድር ። ወበህየ : ርኢኩ : መዛግብተ : ዕፅዋን
 : ወእምኔሆሙ : ይትከፈሉ : ነፋሳት : ወመዝገበ :
 በረድ : ወመዝገበ : ጊሜ : ወዘደመናት : ወደመና :
 ዚአሁ : እምላዕለ : ምድር : የኅድር : እምቅድመ :
 ዓለም ። ወርኢኩ : መዛግብተ : ፀሐይ : ወዘወርኅ :
 እምአይቱ : ይወጽኡ : ወአይቱ : ይገብኡ :
 ወግብአቶሙ : ስብሕ ፤ ወእፎ : ይከብር :
 ፩እምካልኡ : ወምኋሮሙ : ብዑል : ወኢየኅልፉ :
 ምኋረ : ወኢይዌስኩ : ወኢየሐፅፁ : እምኋረ :
 ዚአሆሙ : ወሃይማኖቶሙ : የዐቅቡ : ፩ : ምስለ :
 ካልኡ : በመሐላ : ዘነበሩ ። ወይወፅእ : ቅድመ :
 ፀሐይ : ወይገብር : ፍኖቶ : በትእዛዘ : እግዚአ :
 መናፍስት : ወይጸንዕ : ስሙ : ለዓለመ : ዓለም ።
 ወእምድኅረዝ : ፍኖት : ዘኅቡእ : ወዘክሡት : ዘወርኅ
 : ወምኋረ : ፍኖቱ : ይፌጽም : በውእቱ : መካን :
 በመዓልት : ወበሌሊት : ፩ : ለካልኡ : ይኔጽር :
 በቅድመ : እግዚአ : መናፍስት : ወየአኩቱ :
 ወይሴብሐ : ወኢያዐርፉ : እስመ : አኩቱቶሙ :
 ዕረፍት : ውእቱ : ሎሙ ። እስመ : ለፀሐይ : ብሩህ
 : ብዙኅ : ምያጤ : ቦቱ : ለበረከት : ወለመርገም :
 ወምርዋጸ : ፍኖቱ : ለወርኅ : ለጻድቃን : ብርሃን :
 ወለኃጥአን : ጽልመት : በስሙ : ለእግዚእ : ዘፈጠረ
 : ማእከለ : ብርሃን : ወማእከለ : ጽልመት : ወከፈለ
 : መንፈሶሙ : ለሰብእ : ወአጽንዐ : መንፈሶሙ :
 ለጻድቃን : በስመ : ጽድቀ : ዚአሁ ። እስመ :
 መልአክ : ኢይከልእ : ወሥልጣን : ኢይክል : ከሊአ
 : እስመ : መኰንን : ለኩሎሙ : ይፊኢ : ወእሎንተ
 : ኩሎሙ : በቅድሜሁ : ውእቱ : ይኳንን ።
 42 ጥበብ : መካነ : ኢረከበት : ኅበ : ተኅድር :
 ወሀለወት : ማኅደራ : ውስተ : ሰማያት ። መጽአት :
 ጥበብ : ከመ : ትኅድር : ውስተ : ውሉደ : ሰብእ :
 ወኢረከበት : ማኅደረ ፤ ጥበብ : ውስተ : መካና :
 ገብአት : ወተፅዕነት : ማእከለ : መላእክት ። ወዐመፃ
 : ወፅአት : እመዛግብቲሃ : ዘኢፈቀደት : ረከበት :
 ወኅደረት : ውስቱቶሙ : ከመ : ዝናም : በበድው :
 ወከመ : ጠል : በምድር : ጽምእት ።

43 ወርኢኩ ፡ ካልአ ፡ መባርቅተ ፡ ወከዋክብተ ፡
ሰማይ ፡ ወርኢኩ ፡ ከመ ፡ ይጼውዎሙ ፡ ለኩሎሙ ፡
በበአስማቲሆሙ ፡ ወይሰምዕዎ ። ወርኢክዎ ፡ በመዳልወ
፡ ጽድቅ ፡ ከመ ፡ ይደለዉ ፡ በብርሃናቲሆሙ ፡
በራህበ ፡ መካናቲሆሙ ፡ ወዕለተ ፡ ኩነቶሙ ፡
ወሚጠቶሙ ፤ መብረቅ ፡ መብረቀ ፡ ይወልድ ፤
ወሚጠቶሙ ፡ በኑልቄ ፡ መላእክት ፡ ወሃይማኖቶሙ
፡ የዐቅቡ ፡ በበይናቲሆሙ ። ወተስእልክዎ ፡ ለመልአክ
፡ ዘየሐውር ፡ ምስሌየ ፡ ዘአርአየኒ ፡ ዘኅቡእ ፡ ምንት
፡ እሎንቱ ። ወይቤለኒ ፡ ምስለ ፡ ዘዚአሆሙ ፡
አርአየከ ፡ እግዚአ ፡ መናፍስት ፡ እሉ ፡ እሙንቱ ፡
አስማቲሆሙ ፡ ለጻድቃን ፡ እለ ፡ የኅድሩ ፡ ዲበ ፡
የብስ ፡ ወየአምኑ ፡ በስሙ ፡ ለእግዚአ ፡ መናፍስት ፡
ለዓለመ ፡ ዓለም ።

44 ወካልአተ ፡ ርኢኩ ፡ በእንተ ፡ መብረቅ ፡ እፎ
፡ ይቀውሙ ፡ እምከዋክብት ፡ ወይከውኑ ፡ መብረቀ ፡
ወኢይክሉ ፡ ኅዲገ ፡ ምስሌሆሙ ።

45 ወዝካልእ ፡ ምሳሌ ፡ ዲበ ፡ እለ ፡ ይክህዱ ፡
ስሞ ፡ ለማኅደረ ፡ ቅዱሳን ፡ ወለእግዚአ ፡ መናፍስት
። እስማየ ፡ የዐርጉ ፡ ወኢምድረ ፡ ይበጽሑ ፡ ከመዝ
፡ ይከውን ፡ ክፍለ ፡ ኃጥኣን ፡ እለ ፡ ይክሕዱ ፡ ስሞ
፡ ለእግዚአ ፡ መናፍስት ፡ እለ ፡ ከመዝ ፡ ይትዐቀብ ፡
ለዕለተ ፡ ሥራህ ፡ ወምንዳቤ ። በይእቲ ፡ ዕለት ፡
ይነብር ፡ በመንበረ ፡ ስብሐት ፡ ኅሩይ ፡ ወየኅሪ ፡
ምግባሪሆሙ ፡ ወምዕራፎሙ ፡ ኑልቀ ፡ አልቦሙ ፡
ወመንፈሶሙ ፡ በማእከሎሙ ፡ ትጽንዕ ፡ ሶበ ፡ ርእይዎ
፡ ለኅሩየ ፡ ዚአየ ፡ ወለእለ ፡ ሰከዩ ፡ ስምየ ፡ ቅዱስ
፡ ወስቡሐ ። ወበይእቲ ፡ ዕለት ፡ አነብሮ ፡
በማእከሎሙ ፡ ለኅሩየ ፡ ዚአየ ፡ ወእዌልጣ ፡ ለሰማይ
፡ ወእገብራ ፡ ለበረከት ፡ ወብርሃን ፡ ዘለዓለም ።
ወእዌልጣ ፡ ለየብስ ፡ ወእገብራ ፡ ለበረከት ፡
ወለኅሩያነ ፡ ዚአየ ፡ አነብሮሙ ፡ ውስቴታ ፡ ወእለ ፡
ይገብሩ ፡ ኅጢአተ ፡ ወጌጋየ ፡ እይከይዱ ፡ ውስቴታ
። እስመ ፡ አነ ፡ ርኢክዎሙ ፡ ወአጽገብክዎሙ ፡
በሰላም ፡ ለጻድቃንየ ፡ ወአንበርክዎሙ ፡ ቅድሜየ ፡
ወቀርበት ፡ ኅቤየ ፡ ኩነኔ ፡ ለኃጥኣን ፡ ከመ ፡
አህጉሎሙ ፡ እምገጸ ፡ ምድር ።

46 ወበህየ : ርኢኩ : ዘሎቱ : ርእሰ : መዋዕል :
 ወርእሱ : ከመ : ፀምር : ጸዐዳ : ወምስሌሁ : ካልእ
 : ዘገጹ : ከመ : ርእየተ : ሰብእ : ወምሉእ : ጸጋ :
 ገጹ : ከመ : ፩እመላእክት : ቅዱሳን ። ወተስእልክዎ
 : ለ፩እመላእክት : ዘየሐውር : ምስሌየ : ወኸሎ :
 ጎቡኣተ : ዘኣርአየኒ : በእንተ : ዝኹ : ወልደ : ሰብእ
 : መኑ : ውእቱ : ወእምአይቱ : ይከውን : ውእቱ :
 በእንተ : ምንት : ምስለ : ርእሰ : መዋዕል : የሐውር
 ። ወአውሥኣኒ : ወይቤለኒ : ዝንቱ : ውእቱ : ወልደ
 : ሰብእ : ዘሎቱ : ኮነ : ጽድቅ : ወጽድቅ :
 ምስሌሁ : ኃደረ : ወኸሎ : መዛግብተ : ዘጎቡእ :
 ውእቱ : ይከሥት : እስመ : እግዚአ : መናፍስት :
 ኪያሁ : ጎረየ : ወዘክፍሉ : ኸሎ : ሞአ : በቅድመ
 : እግዚአ : መናፍስት : በርትዕ : ለዓለም ። ወዝንቱ
 : ወልደ : ሰብእ : ዘርኢከ : ያነሥኦሙ : ለነገሥት
 : ወለጎያላን : እምስካባቲሆሙ : ወለጽኑዓን :
 እመናብርቲሆሙ : ወይፈትሕ : ልንማተ : ጽኑዓን :
 ወያደቅቅ : አስናነ : ኃጥኣን ። ወይገፈትሆሙ :
 ለነገሥት : እመናብርቲሆሙ : ወእመንግሥቶሙ :
 እስመ : እያሌዕልዎ : ወኢይሴብሕዎ : ወኢይገንዩ :
 እምአይቱ : ተውህበት : ሎሙ : መንግሥት ። ወገጸ
 : ጽኑዓን : ይገፈትዕ : ወይመልኦሙ : ጎፍረት :
 ወጽልመት : ይከውኖሙ : ማጎደሪሆሙ : ወዕፄያት :
 ይከውኖሙ : ምስካባሙ : ወኢይሴፈዉ : ከመ :
 ይትነሥኡ : እምስካባቲሆሙ : እስመ : ኢያሌዕሉ :
 ሰሞ : ለእግዚአ : መናፍስት ። ወእሙንቱ : ኮኑ :
 እለ : ይኳንኑ : ከዋክብተ : ሰማይ : ወያሌዕሉ :
 እደዊሆሙ : ውስተ : ልዑል : ወይከይዱ : ዲበ :
 የብስ : ወየጎድሩ : ውስቴታ : ወኸሎ : ተግባሮሙ :
 ዐመፃ : ወያርእዩ : ተግባሮሙ : ዐመፃ : ወጎይሎሙ
 : ዲበ : ብዕሎሙ : ወሃይማኖቶሙ : ኮነ :
 ለአማልክት : እለ : ገብሩ : በእደዊሆሙ : ወክሕድዎ
 : ለስሙ : ለእግዚአ : መናፍስት ። ወይሰደዱ :
 እምኣብያተ : ምስትጉቡኣ : ዚኣሁ : ወለመሃይምናን
 : እለ : ስቁላን : በስሙ : ለእግዚአ : መናፍስት ።
 47 ወበውእቱ : መዋዕል : ዐርገት : ጸሎተ :
 ጻድቃን : ወደመ : ጻድቅ : እምነ : ምድር : ቅድመ
 : እግዚአ : መናፍስት ። በእሉ : መዋዕል : የጎብሩ :
 ቅዱሳን : እለ : ይነብሩ : መልዕልተ : ሰማያት :
 በ፩ቃል : ወያስተበቑዑ : ወይጼልዩ : ወይሴብሐ :
 ወያኣኸቱ : ወይባርኩ : ለስሙ : ለእግዚአ :
 መናፍስት : በእንተ : ደመ : ጻድቃን : ዘተክዕወ :
 ወጸሎቶሙ : ለጻድቃን : ከመ : ኢትፀራእ : በቅድመ
 : እግዚአ : መናፍስት : ከመ : ይትገበር : ሎሙ :
 ኸነኔ : ወትዕግሥት : ኢይኩን : ሎሙ : ለዓለም ።
 ወበእማንቱ : መዋዕል : ርኢክዎ : ለርእሰ : መዋዕል
 : ሶበ : ነበረ : በመንበረ : ስብሐቲሁ : ወመጻሕፍተ
 : ሕያዋን : በቅድሜሁ : ተከሥቱ : ወኸሎ : ጎይሉ
 : ዘመልዕልተ : ሰማያት : ወዐውደ : ዚኣሁ :
 ይቀውሙ : ቅድሜሁ ። ወልበሙ : ለቅዱሳን :
 ትመልእ : ፍሥሐ : እስመ : በጽሐ : ኅልቋ :
 ለጽድቅ : ወጸሎቶሙ : ለጻድቃን : ተሰምዐ : ወደሙ
 : ለጻድቅ : በቅድመ : እግዚአ : መናፍስት :
 ተፈቅደ ።

48 ወበውእቱ ፡ መካን ፡ ርኢኩ ፡ ነቅዐ ፡ ጽድቅ ፡
 ወኢይትሕለቀ፡ ወበዐውዱ ፡ የዐውዶ ፡ ብዙኅ ፡
 አንቅዕተ ፡ ጥበብ ፡ ወኩሎሙ ፡ ጽሙአን ፡ ይሰትዩ ፡
 እምኔሆሙ ፡ ወይትመልኡ ፡ ጥበበ ፡ ወማኅደሪሆሙ ፡
 ምስለ ፡ ጻድቃን ፡ ወቅዱሳን ፡ ወኅሩያን ። ወበይእቲ
 ፡ ሰዓት ፡ ተጸውዐ ፡ ዝኩ ፡ ወልደ ፡ ሰብእ ፡ በኅበ ፡
 እግዚአ ፡ መናፍስት ፡ ወስሙ ፡ መቅድመ ፡ ርእሰ ፡
 መዋዕል ። ወዘእንበለ ፡ ይትፈጠር ፡ ፀሐይ ፡ ወተአምር
 ፡ ዘእንበለ ፡ ይትገበሩ ፡ ከዋክብተ ፡ ሰማይ ፡ ወስሙ
 ፡ ተጸውዐ ፡ በቅድመ ፡ እግዚአ ፡ መናፍስት ። ውእቱ
 ፡ ይከውን ፡ በትረ ፡ ለጻድቃን ፡ ወቅዱሳን ፡ ከመ ፡
 ቦቱ ፡ ይትመርጡዙ ፡ ወኢይደቁ ፡ ወውእቱ ፡ ብርሃነ
 ፡ አሕዛብ ፡ ወውእቱ ፡ ይከውን ፡ ተስፋ ፡ ለእለ ፡
 የሐሙ ፡ በልቦሙ ። ይወድቁ ፡ ወይሰግዱ ፡ ቅድሜሁ
 ፡ ኩሎሙ ፡ እለ ፡ የኅድሩ ፡ ዲበ ፡ የብስ ፡
 ወይባርክዎ ፡ ወይሴብሕዎ ፡ ወይዜምሩ ፡ ሎቱ ፡ ለስመ
 ፡ እግዚአ ፡ መናፍስት ። ወበእንተዝ ፡ ኮነ ፡ ኅሩየ ፡
 ወኅቡአ ፡ በቅድሜሁ ፡ እምቅድመ ፡ ይትፈጠር ፡
 ዓለም ፡ ወእስከ ፡ ለዓለም ፡ በቅድሜሁ ። ወከሠቶ ፡
 ለቅዱሳን ፡ ወለጻድቃን ፡ ጥበቡ ፡ ለእግዚአ ፡
 መናፍስት ፡ እስመ ፡ ዐቀበ ፡ ክፍሎሙ ፡ ለጻድቃን ፡
 እስመ ፡ ጸልእዎ ፡ ወመነንዎ ፡ ለዝ ፡ ዓለም ፡ ዘዐመዓ
 ፡ ወኩሎ ፡ ምግባሮ ፡ ወፍናዊሁ ፡ ጸልኡ ፡ በስሙ ፡
 ለእግዚአ ፡ መናፍስት ፡ እስመ ፡ በስመ ፡ ዚአሁ ፡
 ይድኅኑ ፡ ወፈቃዴ ፡ ኮነ ፡ ለሕይወቶሙ ። ወበውእቱ
 ፡ መዋዕል ፡ ኮኑ ፡ ትሑታኅ ፡ ገጽ ፡ ነገሥተ ፡ ምድር
 ፡ ወጽኑዓን ፡ እለ ፡ ይእኅዝዋ ፡ ለየብስ ፡ በእንተ ፡
 ምግባረ ፡ እደዊሆሙ ፡ እስመ ፡ በዕለተ ፡ ጸዕቆሙ ፡
 ወጻሕቦሙ ፡ ኢያድኅኑ ፡ ነፍሶሙ ። ወውስተ ፡
 እደዊሆሙ ፡ ለኅሩያነ ፡ ዚአየ ፡ እወድዮሙ ፡ ከመ ፡
 ሣዕር ፡ ውስተ ፡ እሳት ፡ ወከመ ፡ ዐረር ፡ ውስተ ፡
 ማይ ፡ ከመዝ ፡ ይውዕዩ ፡ እምቅድመ ፡ ገጸ ፡
 ጻድቃን ፡ ወይሰጠሙ ፡ እምቅድመ ፡ ገጸ ፡ ቅዱሳን ፡
 ወኢይትረከብ ፡ ሎሙ ፡ አሰር ። ወበዕለተ ፡ ጻሕበ ፡
 ዚአሆሙ ፡ ዕረፍት ፡ ትከውን ፡ በዲበ ፡ ምድር ፡
 ወበቅድሜሁ ፡ ይወድቁ ፡ ወኢይትነሥኡ ፡ ወአልቦ ፡
 ዘይትሜጠዎሙ ፡ በእደዊሁ ፡ ወያነሥኡሙ ፡ እስመ ፡
 ክሕድዎ ፡ ለእግዚአ ፡ መናፍስት ፡ ወለመሲሑ ፡
 ወይትባረክ ፡ ስሙ ፡ ለእግዚአ ፡ መናፍስት ።
 49 እስመ ፡ ጥበብ ፡ ተክዕወ ፡ ከመ ፡ ማይ ፡
 ወስብሐት ፡ ኢተኅልቅ ፡ ቅድሜሁ ፡ ለዓለመ ፡ ዓለም
 ። እስመ ፡ ኅያል ፡ ውእቱ ፡ በኩሉ ፡ ኅቡአተ ፡
 ጽድቅ ፡ ወዐመዓ ፡ ከመ ፡ ጽኅሎት ፡ የኅልፍ ፡
 ወምቅዋም ፡ አልቦ ፡ እስመ ፡ ቆመ ፡ ኅሩይ ፡
 በቅድመ ፡ እግዚአ ፡ መናፍስት ፡ ወስብሐቲሁ ፡
 ለዓለመ ፡ ዓለም ፡ ወኅይሉ ፡ ለትውልደ ፡ ትውልድ
 ። ወቦቱ ፡ የኅድር ፡ መንፈስ ፡ ጥበብ ፡ ወመንፈስ ፡
 ዘያሌቡ ፡ ወመንፈስ ፡ ትምህርት ፡ ወኅይል ፡
 ወመንፈስ ፡ እለ ፡ ኖሙ ፡ በጽድቅ ። ወውእቱ ፡
 ይኳንን ፡ ዘኅቡአት ፡ ወነገረ ፡ በክ ፡ እልቦ ፡ ዘይክል
 ፡ ብሂለ ፡ በቅድሜሁ ፡ እስመ ፡ ኅሩይ ፡ ውእቱ ፡
 በቅድመ ፡ እግዚአ ፡ መናፍስት ፡ በከመ ፡ ውእቱ ፡
 ፈቀደ ።

50 ወበእማንቱ ፡ መዋዕል ፡ ሚጠት ፡ ትከውን ፡
 ለቅዱሳን ፡ ወለኅሩያን ፡ ወብርሃን ፡ መዋዕ ፡ ዲቤሆሙ
 ፡ የኅድር ፡ ወስብሐት ፡ ወክብር ፡ ለቅዱሳን ፡
 ይትመየጥ ። ወበዕለት ፡ እንተ ፡ ጸሕብ ፡ ትዘገብ ፡
 እኪት ፡ ላዕለ ፡ ኃጥኣን ፡ ወይመውኡ ፡ ጸድቃን ፡
 በስሙ ፡ ለእግዚአ ፡ መናፍስት ፡ ወያርኢ ፡ ለካልኣን
 ፡ ከመ ፡ ይነስሑ ፡ ወይኅድጉ ፡ ምግባረ ፡ እደዊሆሙ
 ። ወኢይከውን ፡ ሎሙ ፡ ክብር ፡ በቅድመ ፡ እግዚአ
 ፡ መናፍስት ፡ ወበስሙ ፡ ይድኅኑ ፡ ወእግዚአ ፡
 መናፍስት ፡ ይምሕሮሙ ፡ እስመ ፡ ብዙኅ ፡ ምሕረቱ
 ። ወጸድቅ ፡ ውእቱ ፡ በኩነኔሁ ፡ ወበቅድመ ፡
 ስብሐቲሁ ፡ ወዐመፃ ፡ እትቀውም ፡ በኩነኔሁ ፡
 ዘኢይኔስሕ ፡ በቅድሜሁ ፡ ይትሐገውል ። ወእምይእዜሰ
 ፡ ኢይምሕሮሙ ፡ ይቤ ፡ እግዚአ ፡ መናፍስት ።

51 ወበእማንቱ ፡ መዋዕል ፡ ታገብእ ፡ ምድር ፡
 ማኅፀንታ ፡ ወሲኦል ፡ ታገብእ ፡ ማኅፀንታ ፡
 ዘተመጠወት ፡ ወኅጉል ፡ ያገብእ ፡ ዘይፈዲ ። ወየኅሪ
 ፡ ጸድቃን ፡ ወቅዱሳነ ፡ እምኔሆሙ ፡ እስመ ፡ ቀርበት
 ፡ ዕለት ፡ ከመ ፡ እሙንቱ ፡ ይድኅኑ ። ወኅሩይ ፡
 በእማንቱ ፡ መዋዕል ፡ ዲበ ፡ መንበሩ ፡ ይነብር ፡
 ወኩሉ ፡ ኅቡኣተ ፡ ጥበብ ፡ እምሕሊና ፡ አፉሁ ፡
 ይወፅእ ፡ እስመ ፡ እግዚአ ፡ መናፍስት ፡ ወሀቦ ፡
 ወስብሐ ። ወበእማንቱ ፡ መዋዕል ፡ ይዘፍኑ ፡ አድባር
 ፡ ከመ ፡ ሐራጊት ፡ ወአውግርኒ ፡ ያንፈርዕፅ ፡ ከመ
 ፡ መሐስዕ ፡ ጽጉባነ ፡ ሐሊብ ፡ ወይከውኑ ፡ ኩሎሙ
 ፡ መላእክተ ፡ በሰማይ ። ገጾሙ ፡ ይበርህ ፡ በፍሥሐ
 ፡ እስመ ፡ በእማንቱ ፡ መዋዕል ፡ ኅሩይ ፡ ተንሥኦ ፡
 ወምድር ፡ ትትፈሣሕ ፡ ወጸድቃን ፡ ዲቤሃ ፡ የኅድሩ
 ፡ ወኅሩያን ፡ ውስቴታ ፡ የሐውሩ ፡ ወያንሶስዉ ።

52 ወእምድኅረ : እማንቱ : መዋዕል : በውእቱ :
 መካን : ኅበ : ርኢኩ : ኩሎ : ራእያተ : ዘኅቡእ :
 እስመ : ተመሠጥኩ : በነኩርኳረ : ነፋስ : ወወሰዱኒ
 : ውስተ : ዐረብ ። በህየ : ርእያ : አዕይንትየ :
 ኅቡአተ : ሰማይ : ኩሎ : ዘይከውን : ሀሎ : በዲበ
 : ምድር : ደብረ : ሐዲን ፤ ወደብረ : ፀሪቅ ፤
 ወደብረ : ብሩር ፤ ወደብረ : ወርቅ ፤ ወደብረ :
 ነጠብጣብ ፤ ወደብረ : ዐረር ። ወተስእልክዎ :
 ለመልአክ : ዘየሐውር : ምስሌየ : እንዘ : እብል :
 ምንት : ውእቱ : እሉ : እሙንቱ : እለ : በኅቡዕ :
 ርኢኩ ። ወይቤለኒ : እሉ : ኩሎሙ : ዘርኢከ :
 ለሥልጣነ : መሲሑ : እሙንቱ : ይከውኑ : ከመ :
 የአዝዝ : ወይትኅየል : ዲበ : ምድር ። ወአውሥኦኒ :
 እንዘ : ይብል : ውእቱ : መልአክ : ሰላም : ጽናሕ
 : ንስቲተ : ወትሬኢ : ወይትከሠት : ለከ : ኩሉ :
 ዘኅቡእ : ዘተከለ : እግዚአ : መናፍስት ። ወእሎንቱ :
 አድባር : ዘርኢከ : ደብረ : ሐዲን ፤ ወደብረ : ፀሪቅ
 ፤ ወደብረ : ብሩር ፤ ወደብረ : ወርቅ ፤ ወደብረ :
 ነጠብጣብ ፤ ወደብረ : ዐረር ፤ እሉ : ኩሎሙ :
 ቅድሜሁ : ለኅሩይ : ይከውኑ : ከመ : መዓረ : ግራ
 : ዘቅድመ : ገጸ : እሳት : ወከመ : ማይ : ዘይወርድ
 : እምላዕሉ : ዲበ : እማንቱ : አድባር : ወይከውኑ :
 ድኩማነ : በቅድመ : እገሪሁ ። ወይከውን : በእማንቱ
 : መዋዕል : ኢይድኅኑ : ኢበወርቅ : ወኢበብሩር :
 ወኢይክሉ : ድኒነ : ወጐይየ ። ወኢይከውን : ሐዲን
 : ለፀብእ : ወኢልብስ : ለድርዐ : እንግድዓ :
 እይበቁዕ : ብርት : ወኢናዕክ : ኢይበቁዕ :
 ወኢይትጌለቁ : ወዐረር : እይትፈቀድ ። እሉ :
 ኩሎሙ : ይትከሐዱ : ወይትኅጐሉ : ሀለዉ : እምገጸ
 : ምድር : ሶበ : ያስተርኢ : ኅሩይ : በቅድመ : ገጹ
 : ለአግዚአ : መናፍስት ።

53 ወበህየ : ርእያ : አዕይንትየ : ቈላ : ዕሙቀ :
 ወርኅው : አፉሁ : ወኩሎሙ : እለ : የኅድሩ : ዲበ
 : የብስ : ወባሕር : ወደሰያት : አምኃ : ወአስትዓ :
 ወጋዳ : ያመጽኡ : ሎቱ : ወዝክቱስ : ቈላ : ዕሙቅ
 : ኢይመልእ ። ወጌጋየ : እደዊሆሙ : ይገብሩ :
 ወኩሎ : ዘይጸምዉ : ለጌጋይ : ኃጥኦን : ይበልዑ :
 ወእምገጹ : ለእግዚአ : መናፍስት : ይትኅጐሉ :
 ኃጥኦን : ወእምገጸ : ለምድረ : ዚአሁ : ይትቀወሙ :
 ወኢየኅልቁ : ለዓለመ : ዓለም ። እስመ : ርኢክዎሙ
 : ለመላእክተ : መቅሠፍት : እንዘ : የሐውሩ :
 ወያስተዳልዉ : ኩሎ : መባዕላተ : ለሰይጣን ።
 ወተስእልክዎ : ለመአከ : ሰላም : ዘየሐውር : ምስሌየ
 : እሎንተ : መባዕላተ : ለመኑ : ያስተዳልውዎሙ ።
 ወይቤለኒ : እሎንተ : ያስተዳልውዎሙ : ለነገሥት :
 ወለኅያላን : ዘዝንቱ : ምድር : ከመ : ቦቱ :
 ይትሐጐሉ ። ወእምድኅረ : ዝንቱ : ያስተርኢ : ጻድቅ
 : ወኅሩይ : ቤተ : ምስትጉቡኦ : ዚአሁ : እምይእዜ
 : ኢይትከልኡ : በስሙ : ለእግዚአ : መናፍስት ።
 ወእሉ : አድባር : ይከውኑ : በቅድመ : ገጹ : ከመ
 : ምድር : ወአውግር : ይከውኑ : ከመ : ነቅዐ :
 ማይ : ወያዐርፉ : ጻድቃን : እም : ጻማ : ኃጥኦን ።

54 ወነጸርኩ ፡ ወተመየጥኩ ፡ ካልአ ፡ ገጸ ፡ ምድር
 ፡ ወርኢኩ ፡ ህየ ፡ ቈላ ፡ ዕሙቀ ፡ እንዘ ፡ ትነድድ
 ፡ እሳት ። ወአምጽእዎሙ ፡ ለነገሥት ፡ ወለኅያላን ፡
 ወወደይዎሙ ፡ ውስተ ፡ ዕሙቅ ፡ ቈላ ። ወበህየ ፡
 ርእያ ፡ አዕይንትየ ፡ ዘመባዕላቲሆሙ ፡ እንዘ ፡
 ይገብርዎሙ ፡ መዓሠርተ ፡ ኅዚን ፡ ዘአልቦ ፡
 መድሎት ። ወተስእልክዎ ፡ ለመልአከ ፡ ሰላም ፡
 ዘየሐውር ፡ ምስሌየ ፡ እንዘ ፡ እብ ፡ እሉ ፡
 ማእሥራተ ፡ መባዕላት ፡ ለመኑ ፡ ይዴለዉ ። ወይቤለኒ
 ፡ እሉ ፡ ይዴለዉ ፡ ለትዕይንተ ፡ አዛዝኤል ፡ ከመ ፡
 ይትመጠውዎሙ ፡ ወይደይዎሙ ፡ መትሕተ ፡ ኩሉ ፡
 ደይን ፡ ወአእባነ ፡ ጠዋያተ ፡ ይከድኑ ፡ መላትሒሆሙ
 ፡ በከመ ፡ አዘዘ ፡ እግዚአ ፡ መናፍስት ። ሚካኤል ፡
 ወገብርኤል ፡ ሩፋኤል ፡ ወፋኑኤል ፡ ውእቶሙ ፡
 ያጸንዕዎሙ ፡ በይእቲ ፡ ዕለት ፡ ዐባይ ፡ በውስተ ፡
 ዕቶነ ፡ እሳት ፡ ዘይነድድ ፡ ይወድይዎሙ ፡ ውእተ ፡
 ዕለተ ፡ ከመ ፡ ይትበቀል ፡ እምኔሆሙ ፡ እግዚአ ፡
 መናፍስት ፡ በዐመፃሆሙ ፡ በእንተ ፡ ዘኩኑ ፡ ላእካነ ፡
 ለሰይጣን ፡ ወአስሐትዎሙ ፡ ለእለ ፡ የኅድሩ ፡ ዲበ ፡
 የብስ ። ወበውእቱ ፡ መዋዕል ፡ ይወጽእ ፡ መቅሠፍቱ
 ፡ ለእግዚአ ፡ መናፍስት ፡ ወይትረኅዉ ፡ ኩሉ ፡
 መዛግብተ ፡ ማያት ፡ ዘመልዕልተ ፡ ሰማያት ፡ ወዲበ
 ፡ አንቅዕት ፡ እለ ፡ መትሕተ ፡ ሰማያት ፡
 ወዘመትሕተ ፡ ምድር ። ወይዴመሩ ፡ ኩሎሙ ፡
 ማያት ፡ ምስለ ፡ ማያት ፡ ዘመልዕልተ ፡ ሰማያት ፡
 ማይሰ ፡ ዘመልዕልተ ፡ ሰማይ ፡ ተባዕታይ ፡ ውእቱ ፡
 ወማይ ፡ ዘመትሕተ ፡ ምድር ፡ አንስታይ ፡ ይእቲ ።
 ወይደመሰሱ ፡ ኩሉ ፡ እለ ፡ የኅድሩ ፡ ዲበ ፡ የብስ ፡
 ወእለ ፡ የኅድሩ ፡ መትሕተ ፡ አጽናፈ ፡ ሰማይ ።
 ወበእንተዝ ፡ አእመርዋ ፡ ለዐመፃሆሙ ፡ እንተ ፡ ገብሩ
 ፡ በዲበ ፡ ምድር ፡ ወበእንተዝ ፡ ይትኅጎሉ ።
 55 ወእምድኅረዝ ፡ ነስሐ ፡ ርእስ ፡ መዋዕል ፡
 ወይቤ ፡ በከ ፡ አሕጎልክዎሙ ፡ ለኩሎሙ ፡ እለ ፡
 ይነብሩ ፡ ዲበ ፡ የብስ ። ወመሐለ ፡ በስሙ ፡ ዐቢይ ፡
 ከመ ፡ እምይእዜ ፡ ኢይገብር ፡ ከመዝ ፡ ለኩሎሙ ፡
 እለ ፡ ይነብሩ ፡ ዲበ ፡ የብስ ፡ ወትእምርተ ፡ እወዲ
 ፡ በሰማያት ፡ ወይከውን ፡ ማእከሌየ ፡ ወማእከሎሙ ፡
 ሃይማኖተ ፡ እስከ ፡ ለዓለም ፡ መጠነ ፡ መዋዕለ ፡
 ሰማይ ፡ ዲበ ፡ ምድር ። ወእምዝ ፡ በትእዛዝየ ፡
 ውእቱ ፡ ሶበ ፡ ፈቀድኩ ፡ ከመ ፡ አጽንዖሙ ፡ በእደ
 ፡ መላእክት ፡ በዕለተ ፡ ምንዳቤ ፡ ወሕማም ፡
 ቅድመዝ ፡ መዓትየ ፡ ወመቅሠፍትየ ፡ የኅድር ፡
 ላዕሌሆሙ ፡ መዓትየ ፡ ወመቅሠፍትየ ፡ ይቤ ፡
 እግዚአብሔር ፡ እግዚአ ፡ መናፍስት ። ነገሥት ፡
 ኅያላን ፡ እለ ፡ ተኅድሩ ፡ ውስተ ፡ የብስ ፡ ሀለወክሙ
 ፡ ትርአይዎ ፡ ለኅሩየ ፡ ዚአየ ፡ ከመ ፡ ይነብር ፡
 በመንበረ ፡ ስብሐትየ ፡ ወይኬንኖ ፡ ለአዛዝኤል ፡
 ወለኩሎሙ ፡ ማኅበረ ፡ ዚአሁ ፡ ወለትዕይንተ ፡ ዚአሁ
 ፡ ኩሎሙ ፡ በስሙ ፡ ለእግዚአ ፡ መናፍስት ።

108 ካልእ ፡ መጽሐፍ ፡ ዘጸሐፈ ፡ ሄኖክ ፡ ለወልዱ
 ፡ ማቱሳላ ፡ ወለእለ ፡ ይመጽኡ ፡ እምድጎሬሁ ፡
 ወየዐቅብ ፡ ሥርዐተ ፡ በደኃሪ ፡ መዋዕል ፡ እለ ፡
 ገበርክሙ ፡ ወትጸንሑ ፡ በእሉ ፡ መዋዕል ፡ እስከ ፡
 ይትፌጸሙ ፡ እለ ፡ ይገብሩ ፡ እኩየ ፡ ወይትፌጸም ፡
 ጎይሎሙ ፡ ለመኡብሳን ፤ አንትሙሰ ፡ ጽንሑ ፡ እስክ
 ፡ ተሐልፍ ፡ ጎጢአት ፡ እስመ ፡ ሀሎ ፡ ስሞሙ ፡
 ይደመሰስ ፡ እመጻሕፍተ ፡ ቅዱሳን ፡ ወዘርእሙ ፡
 ይትሐገጡል ፡ ለዓለም ፡ ወመናፍስቲሆሙ ፡ ይትቀተሉ
 ፡ ወይጸርሑ ፡ ወየዐወይዉ ፡ በመካነ ፡ በድው ፡
 ዘኢያስተርኢ ፡ ወበእሳት ፡ ይነድዱ ፡ እስመ ፡ ኢሀሎ
 ፡ ህየ ፡ ምድር ፡ ወርኢኩ ፡ ህየ ፡ ከመ ፡ ደመና ፡
 ዘኢይትረአይ ፡ እስመ ፡ እምዕመቄ ፡ እክህልኩ ፡ ላዕለ
 ፡ ነጽሮ ፡ ወላህበ ፡ እሳቱ ፡ ርኢኩ ፡ እንዘ ፡ ይነድድ
 ፡ ስቡሕ ፡ ወይትከበቡ ፡ ከመ ፡ አድባር ፡ ስብሐን ፡
 ወይትሀወኩ ፡ ለፌ ፡ ወለፌ ፡ ወተስእልክዎ ፡
 ለ፩እመላእክት ፡ ቅዱሳን ፡ እለ ፡ ምስሌየ ፡ ወእቤሎ ፡
 ምንት ፡ ውእቱ ፡ ዝሰብሕ ፡ እስመ ፡ ኢኮነ ፡ ሰማየ ፡
 አላ ፡ ላህበ ፡ እሳት ፡ ባሕቲቱ ፡ ዘይነድድ ፡ ወቃለ ፡
 ጽራሕ ፡ ወብካይ ፡ ወአውያት ፡ ወሕማም ፡ ጎያል ፡
 ወይቤለኒ ፡ ዝንቱ ፡ መካን ፡ ዘትሬኢ ፡ በህየ ፡
 ይትወደዩ ፡ መናፍስተ ፡ ኃጥአን ፡ ወፅሩፋን ፡ ወእለ
 ፡ ይገብሩ ፡ እኩየ ፡ ወእለ ፡ ይመይጡ ፡ ኩሎ ፡
 ዘነገረ ፡ እግዚአብሔር ፡ በአፈ ፡ ነቢያት ፡ እለ ፡
 ሀለዉ ፡ ይትገበሩ ፡ እስመ ፡ ሀለዉ ፡ እምኔሆሙ ፡
 ጽሑፋን ፡ ወልኩዓን ፡ ላዕለ ፡ በሰማይ ፡ ከመ ፡
 ያንብብዎሙ ፡ መላእክት ፡ ወያእምሩ ፡ ዘሀሎ ፡
 ይብጽሑሙ ፡ ለኃጥአን ፡ ወለመናፍስተ ፡ ትሑታን ፡
 ወእለ ፡ አሕመሙ ፡ ሥጋሆሙ ፡ ወተፈድዩ ፡ እምኅበ
 ፡ አምላክ ፡ ወእለ ፡ ጎስሩ ፡ እምእኩያን ፡ ሰብእ ፤
 እለ ፡ አፍቀርዎ ፡ ለአምላክ ፡ ኢወርቀ ፡ ወኢብሩረ ፡
 ኢያፍቀሩ ፡ ወኢኩሎ ፡ ሠናየ ፡ ዘውስተ ፡ ዓለም ፡
 አላ ፡ ወሀቡ ፡ ሥጋሆሙ ፡ ለጻዕር ፤ ወእለ ፡ እምአመ
 ፡ ኮኑ ፡ ኢፈተዉ ፡ መባልዕተ ፡ ዘውስተ ፡ ምድር ፡
 አላ ፡ ረሰዩ ፡ ርእሶሙ ፡ ከመ ፡ መንፈስ ፡ እንተ ፡
 ጎለፈት ፡ ወዘንተ ፡ ዐቀቡ ፡ ወብዙኃ ፡ አመከሮሙ ፡
 እግዚእ ፡ ወተረክብ ፡ መንፈሳቲሆሙ ፡ በንጽሕ ፡ ከመ
 ፡ ይባርክዎ ፡ ለስሙ ፡ ወኩሎ ፡ በረከቶሙ ፡ ነገርኩ
 ፡ በመጻሕፍት ፡ ወዐሰዮሙ ፡ ለአርእስቲሆሙ ፡ እስመ
 ፡ እሉ ፡ ተረክብ ፡ ያፈቅርዎ ፡ ለሰማይ ፡
 እምእስትንፋሶሙ ፡ ዘለዓለም ፡ ወእንዘ ፡ ይትከየዱ ፡
 እምእኩያን ፡ ሰብእ ፡ ወሰምዑ ፡ እምኅቤሆሙ ፡
 ትዕይርተ ፡ ወጽርፈተ ፡ ወጎስሩ ፡ እንዘ ፡ ይባርኩኒ ፡
 ወይእዜኒ ፡ እጼውዕ ፡ መናፍስቲሆሙ ፡ ለኄራን ፡
 እምትውልድ ፡ እንተ ፡ ብርሃን ፡ ወእዌልጥ ፡ ለእለ ፡
 ተወልዱ ፡ በጽልመት ፡ እለ ፡ በሥጋሆሙ ፡ እተፈድዩ
 ፡ ክብረ ፡ በከመ ፡ ይደሉ ፡ ለሃይማኖቶሙ ፡
 ወአወጽኦሙ ፡ በብሩህ ፡ ብርሃን ፡ ለእለ ፡ ያፈቅርዎ
 ፡ ለስምየ ፡ ቅዱስ ፡ ወአነብር ፡ ፲፩ውስተ ፡ መንበረ ፡
 ክብር ፡ ክብረ ፡ ዚአሁ ፡ ወይትወጎውኑ ፡ በአዝማን
 ፡ ዘአልቦ ፡ ኑልቀኑ ፡ እስመ ፡ ጽድቅ ፡ ኩነኒሁ ፡
 ለአምላክ ፡ እስመ ፡ ለመሃይምናን ፡ ሃይማኖተ ፡
 ይሁብ ፡ በማጎደረ ፡ ፍናዋት ፡ ርቱዓት ፡
 ወይሬእይዎሙ ፡ ለእለ ፡ ተወልዱ ፡ በጽልመት ፡
 ይትወደዩ ፡ በጽልመት ፡ እንዘ ፡ ይትወጎውኑ ፡
 ጻድቃን ፡ ወይጸርሑ ፡ ወይሬእይዎሙ ፡ ኃጥአን ፡
 እንዘ ፡ ይበርሁ ፡ ወየሐውሩ ፡ እሙንቱሂ ፡ በጎበ ፡
 ተጽሕፈ ፡ ሎሙ ፡ መዋዕል ፡ ወአዝማን ፡